

28354

地180
39
27-54

76587

甘肅全省新通志

卷陸拾玖

甘肅新通志卷之六十九

涼州府

漢段 頴字紀明武威姑臧人少習弓馬輕財好學舉孝廉爲陽陵令有能名延壽二年遷護羌校尉會燒當八種羌寇隴西金城頴擊大破之尋討上郡沈氏諸羌涼州刺史郭閔誣以罪召頴下獄羌寇轉盛涼州幾亡乃復以頴爲護羌校尉擊之斬獲無算永康九年諸羌復寇武威頴追及於鸞鳥殺其渠帥斬首二千餘級羌於此定頴每在邊與將士同苦故皆樂死初頴與皇甫威明張然明並知名顯達時號涼州三明明云

段 煨武威人以中郎將屯華陰特修農事李郭之亂車駕東遷煨具服御及公卿資儲請帝幸其營楊定與煨有隙誣煨欲反攻其營十餘日不下而煨奉給御膳廩贍百官終無二意建安三年

甘肅新通志

卷六十九

人物志 羣材四

一

汜旣死詔煨與關中諸將討誅李傕以煨爲安南將軍封闕鄉侯三國魏賈 詡字文和武威人初舉孝廉爲郎又爲平津都尉後依張繡爲謀主曹操征繡軍退繡追先敗後勝如詡料及操拒袁紹於官渡詡勸繡歸操操表詡執金吾封都亭侯用其計敗紹時文帝爲五官將而臨淄侯植才名方盛有奪嫡之志詡勸文帝不違子道又以袁本初劉景升父子諷操太子遂定詡自以非曹舊臣而策謀深長懼見猜嫌闔門自守男女嫁娶不結高門當時論智計者歸之文帝以詡爲太尉謚曰敬侯

北齊段 榮武威人祖信以豪族徙家五原郡榮好歷術專意星象後魏正光中謂人曰吾今觀天象察人事不及十年當薦亂矣及齊神武起兵榮贊成之論功封姑臧縣侯

段 韶榮子有將領才略以武明皇后甥齊神武益器重之韶襲

父爵事神武文襄加廣平郡公出總軍旅入參帷幄功高望重又教誨子弟閨門雍睦事後母以孝聞齊代勳貴罕有及者

梁陰子春字幼文武威姑臧人晉義熙末曾祖襲隨宋武帝南遷至南平因家焉父智伯與梁武帝鄰居少相友善見帝卧有異光成五色因握帝手曰公後非人臣也天下方亂安蒼生者其在君乎帝曰幸勿多言及帝踐位拜涼秦二州刺史子春雖無佗才能臨人以廉潔稱太清二年遷侍中屬侯景亂隨王僧辨攻平邵陵至貝磯與景遇力戰恆冠諸軍會郢州陷卒於江陵

陳陰 鏗字子堅子春子博涉史傳尤善五言詩爲當時所重陳天嘉中爲始興王錄事參軍文帝燕羣臣賦詩徐陵言之帝卽日召鏗與宴使賦新成安樂宮詩鏗援筆便就帝甚賞之果遷晉陵太守散騎常侍著書見藝文目錄

甘肅新通志

卷六十九

人物志

羣材四

二

唐李光進其先河曲諸部姓阿跌氏貞觀中內屬以其地爲雞田州世襲刺史隸朔方軍光進與弟光顏少依舍利葛旃葛旃妻其女兄也初葛旃殺僕固瑒歸河東辛雲京遂與光進俱家太原以沈果稱從馬燧救臨洺戰洹水有功歷御史大夫代州刺史元和四年王承宗范希朝引師救易定表光進爲都將時光顏亦至大夫故軍中呼小大夫俄爲振武節度使賜姓以光寵之後徙靈武卒贈尙書左僕射有至性居母喪三年不歸寢

李光顏字光遠葛旃少教以騎射長從河東軍爲裨將節度使馬燧謂曰若有奇相終必光大解所佩劍贈之討李懷光楊惠琳戰有功從高崇文平劍南數寨旗陷軍出入若神益知名進代洛州刺史元和九年討蔡詔以其軍當一面明年大破賊光顏將數騎突入賊中反往一再矢集其身如蝟子攬馬鞅諫無深入光顏

挺刃叱之於是士爭奮賊乃潰北俄又與烏重穎破賊小澗河捷
聞進檢校尚書左僕射十二年敗賊於鄆城守將董懷金令董昌
齡開門降韓宏素蹇縱陰挾賊自重且惡光顏忠力思有以撓
之乃飾名姝教歌舞六博遣使遺光顏光顏會諸將校婉辭致謝
厚賂使者還之諸將皆感激流涕士氣益勵裴度築赫連城於池
口率輕騎觀之賊以奇兵自五溝至大呼薄戰光顏力戰卻之先
是光顏策賊必至密遣田布伏精騎溝下扼其歸賊敗去由是賊
悉銳士當光顏而李勣得乘虛入蔡賊平加檢校司空入朝復鎮
忠武吐蕃入寇徙邠甯軍時虜毀鹽州城光顏復城之逐虜出塞
穆宗立加同中書門下平章事敬宗初拜司徒河東節度使卒贈
太尉諡曰忠

元高智耀河西人世仕夏國祖良惠爲右丞相智耀登本國進士第

甘肅新通志

卷六十九

人物志 羣材四

三

夏亡隱賀蘭山元太宗訪河西故家子孫賢者召見將用之遽辭
歸皇子闕端鎮西涼儒者皆隸役智耀謁藩邸請除之欲奏官之
不就憲宗卽位智耀入見言儒者學堯舜禹湯文武之道自古存
國家者用之則治不用則否養成其材將以資其用也宜蠲免徭
役以教育之詔復儒士徭役無有所與世祖卽位召見又力言儒
術有補治道時淮蜀士俘者皆沒爲奴智耀請除之帝從其言卽
拜翰林學士命循行郡縣區別之智耀又言宜仿前代置御史臺
以糾肅官常從之擢西夏中興等路提刑按察使卒贈司徒柱國
追封甯國公諡文忠

高 睿智耀子年十六授符寶郎出入禁闈恭謹詳雅除嘉興路
總管生擒宿盜一郡以甯擢江東道提刑按察使討平草竊遷浙
西道肅政廉訪使按治奸民除淮南道肅政廉訪使縱遣無辜皆

有政績復拜南臺御史中丞務持大體有儒者風卒贈太傅諡曰
貞簡

星 吉河西人少給事仁宗潛邸以精敏稱至治初拜監察御史
有直聲出爲江南行御史臺御史大夫星吉持風裁御史行部必
勸厲而遣之移湖廣行省平章湖廣地連江北威順王歲嘗出獵
民病之又多萃名娼巨賈以網大利有司莫敢忤星吉至責王王
謝之悉罷其所爲有胡僧曰小住持者恃寵橫甚星吉命捕得其
妻妾女樂十八人罪而籍之由是豪強斂手至正十一年汝穎妖
賊起乃命募土兵完城池修器械嚴巡警悉以其事屬老將鄭萬
戶賊來約降知其詐乃械其渠魁數十人以俟命適召爲大司農
同寮受賂釋所械者賊大至內外響應城遂陷武昌人泣曰大夫
不去吾豈爲俘囚星吉入見陳賊本末帝大喜命爲江西行省平
章令守江州時江州已陷募兵得三千人克銅陵乘勝奮擊擒其
渠魁遂復池州石埭據鄱陽口綴江湖要衝日久糧乏援絕力戰
眾死星吉中流矢昏仆賊素聞名昇置密室羅拜饋食星吉不食
七日北面再拜而絕

甘肅新通志

卷六十九

人物志 羣材四

四

明魯 鑑其先西大通人明初率部落歸附命居莊浪父失甲官莊
浪衛指揮同知正統末鑑嗣父職成化四年固原滿四反鑑以土
兵從征出則先驅入則殿後爲賊所憚賊平進總兵官鎮延綏魯
氏世守西陲有捍禦功帝命有司建坊旌其世績鑑條上邊策四
事多議行鑑有材勇遇敵輒冒矢石數被傷不爲阻故能積功至
大將卒贈右都督賜卹如制子麟襲指揮使豪健如其父由甘肅
參將遷副總兵麟子經正德二年襲職積功以總兵官鎮延綏經
驍勇奉職寡過繼祖父爲大帥保功名稱良將

王 賢鎮番忠節剛子由襲職授千戶天順六年以戰功擢指揮僉事旋擢本衛掌印守備修衛開學有功民社封明威將軍子銘由襲職授本衛守備擢都指揮僉事從征涼州尖塔兒有功擢都指揮同知子深由指揮僉事授鎮夷操守

段 琬鎮番歲貢隱居教授多所成就鄉賢文朴李瀚皆其徒也馬 麟字應祥鎮番人勇略過人修繕城垣开拓疆土正德六年六朶乃把罕哈兒炭等寇邊麟率眾禦之連戰皆捷由本衛指揮晉秩都督僉事旋以功擢都指揮同知阿臺之戰麟率指揮張玉千戶王剛禦之事平議敘賞賚最渥歷陞肅州參將

李 震字卯泉鎮番人以庠生襲祖職協守甯夏總督王崇古駐花馬池知套虜有異謀以輕騎三千屬震爲虜所覺部分精銳逆戰震劈其堅陣突入帳中所遇強壯盡殲之白城子之捷以震功

甘肅新通志

卷六十九

人物志 羣材四

五

爲最陞甘肅總兵挂平羌將軍印修葺五郡甌城

何 淮鎮番人百戶勝裔嘉靖中由生員襲副千戶職任本衛守備築西關練民丁治國如家時有諺曰清如何淮不卹鄉怨鎮番初設參將卽以淮陞授歷陞昌平總兵法令整肅無異治鎮年九十餘卒昌平祀之

李 相鎮番人家奇貧蕪蒿讀書寒暑不輟嘉靖七年舉於鄉授雲南大理府通判著有政績

王允亨字平泉鎮番人指揮僉事深子嘉靖十二年由生員襲指揮僉事爲都督前鋒出征河湟等處所遇輒捷以威勇聞於時歷副參十七任官至蘭州府總兵爲肅府儀賓敦詩說禮有儒將風弟允奏嘉靖三十四年武舉由指揮授洪水守備倜儻有將才馮 恩參將麟裔襲鎮番將軍職屢著戰功封金吾將軍歷陞肅

州參將

李 銳鎮番人豁達沖和補諸生就鄉闈不售由明經授四川潼川州判嘗講學柳隄下世號柳隄先生

王允恭鎮番人嘉靖二十七年武舉以功授官百戶歷陞參將卒年百有餘歲

彭秉乾字松軒鎮番人襲指揮僉事嘉靖四十四年從征抹山四十五年征土山湖隆慶二年征黑城凡禦敵斬獲甚多六年授指揮僉事封明威將軍

王國柱字石臺總兵允亨子隆慶四年襲指揮同知才兼文武出征劉亭有功萬曆二十七年懌河東守備歷官副參十三任以善射名

盧 鑛鎮番人器宇魁梧少負大志慷慨好意氣以膽勇聞於時

甘肅新通志

卷六十九

人物志 羣材四

六

龔祖某百戶職禦虜屢著功績今塞外有地名盧千戶營卽鑛戰勝處也萬曆二年與參將王廷佐等經度鞏城推爲勞最後歷官阿壩營遊擊封驃騎將軍

劉道揆字信甫鎮番人萬曆四年舉人因與榜首同經抑置亞元時與衷白先生齊名公車再上大參張九一以詩贈之曰飄然神馬來西極去矣佳人在北方不第卒於道後人以爲詩讖

孟一蛟字養泉鎮番人萬曆十年歲貢官山西黎成縣縣丞清癯似鶴形涖官時有鰭生鵝者一蛟卻不受吏民謠曰自是鶴仙原非鵝吏

王國泰字福臺守備允奏子萬曆十三年由武舉任水泉營守備夙嫻韜略尤以善書名古浪峽有山川絕險甘酒石諸墨蹟今軼何崇德鎮番人性耽經史以諸生襲千戶由永甯防守陞本衛守

備歷任甘州副總兵豐軀雅度勇謀兼長甯鎮兵變崇德挺身往
援大破之後加都督銜

馬 舉鎮番人由襲職官花馬池副將甯鎮之變與副將王國柱
何崇德出征劉李執馘斬首頗著勞績

李秀春鎮番人四川安岳主簿以詩設教從者甚眾子姪多傑士
其由明經出宰百里者三人當時稱三知李氏以嘉之

楊大烈字靜野鎮番人萬曆十三年舉人由河南商邱縣教諭歷
陞湖廣衡州府通判從征四川洞達戎機後以運糧卒於軍題贈
卿銜洛中稱爲河西楊夫子

盧 讓鎮番子穎悟工文盧氏世傳武功至讓始以文學爲後進
倡萬曆中由歲貢官河南靈寶縣教諭再選岷州衛教授年八十
餘卒

甘肅新通志

卷六十九

人物志

羣材四

七

王 言原名允言其先滁州人永樂初從征有功調遷鎮番武德
將軍剛之四世孫也萬曆二十三年武舉襲百戶初選玉泉遊擊
旋調署鎮番參將捍患禦侮桑梓賴之

謝天眷字承寵鎮番人萬曆二十七年歲貢初授甯夏府學訓導
振興文教訓士有方毅然以師道自任士子沛然從焉尋以學行
遷山西武鄉縣教諭訓士一如在甯時後告歸卒於家

劉濟資承昌人貌瑰傑精研孫吳書萬曆間黃臺吉等寇邊攻擊
所至濟資輒請爲前鋒智謀並用功顯於時由百戶峻遷鎮番守
備旋歷參副總鎮甯夏法令嚴明羌虜不敢犯界加大都督

王國正參將允恭子萬曆三十三年功貢授秦州訓導擢貴州新
貴縣知縣旋擢黃平州知州適安酋犯順國正督兵守城有功議
敘遷部職後告歸

王國靖字靈臺遊擊允言子萬曆四十年由文生登武科聯捷進士材長捍禦屢立奇功歷官山西大同總兵挂征西將軍印製火器著陣圖練鐵騎七千調京欽閱賜紵旌獎書名御屏後告歸里疏五上乃允還鄉子扶朱舉人入祀鄉賢

何斯美字雲韶鎮番人守備希閔子萬曆四十三年舉人三任縣令咸有政績山西翼城建祠祀之後遷河南開封府同知子孔述舉人孔學知縣孔成武進士

劉安民字惠甫萬曆四十五年歲貢官城固縣訓導漢南衿士師事之以文行擢河南閩鄉令未任歸

高岐鳳武威人由選貢任羅甯知縣歷陞江南糧儲道宰睢甯時當天啟二年洪水洊至重以兵燹所轄之三山隄防屢潰人憂昏

甘肅新通志

卷六十九

人物志 羣材四

八

多年積弊歲值大旱鄰郡縣苗已稿獨睢甯無缺雨岐鳳任滿去百姓伐石撮其善政有云各郡縣無雨而睢甯獨雨各郡縣禱亦無雨睢甯不禱而雨蓋紀實也子傑士諸生孫上達

王元鎮番人崇禎八年功貢精易學兼通輜略考授山東武城縣丞陞沐陽縣知縣督理河工精敏幹練後以邊材改調武職授守備屢著戰功歷陞江南副總兵引疾歸後終於家著書見藝文目錄

楊思敬鎮番人崇禎十二年歲貢官河南夏邑知縣因闖變挂冠歸著述頗富年八十四以壽終

楊倬鎮番人崇禎十三年功貢官平度州州同改秦安州同取與不苟有四知風度

孟一豸字介泉鎮番人明末歲貢古朴清純聞於時少與兄一鯉

俱受春秋學於舉人楊靜野並樹文名後子姪俱登顯宦一豸鎮靜自如未嘗以富貴驕人壽九十卒未仕後以子良範貴贈通議大夫

曹毓芬永昌人髫年力學不事家人產鄉薦後上公車未第杜門益自刻苦或他適手一編讀驢背上否則俛首構思作賈島推敲狀如是者十載將試禮部謂人曰我今脫穎而出矣果如言蓋崇禎末楊廷鑑榜也授項城令數月卽解組歸村居不入城市筆畊自娛人高其行云

陳朝紀字建表鎮番人性戇直剛悍人呼爲陳村本衛指揮部署屯政定水利時刻人不敢違明末闖寇犯河西招降僞牌至鎮朝紀碎之後明鼎革朝紀素布寬博蓬頭垢面每晨赴城隍廟焚牒曰早求夫婦偕亡不肯苟延旦夕後旬餘夫婦俱沒

甘肅新通志

卷六十九

人物志 羣材四

九

魯希聖莊浪土司世襲指揮闖逆賀錦設計擒之愛其剛勇迫脇萬端毅然不屈且哭且罵淚盡繼之以血守卒稍懈脫身入山不知所終

國朝劉光斗字星燦生員武威人順治戊子回亂嫁禍於民光斗同二逆回赴西安提督孟某質對事白殲逆回二人因請孟某帥師勦同滅之

吳自新生員金萬良姜美周之冕係民兵首領俱武威人回亂四人謀殲羣逆事平提督孟某各給額以獎

高上達武威人康熙間由文學中式武舉時 朝廷用兵西陲靖逆侯張勇駐軍秦州上達投麾下臨陣先人冒矢石張奇之奏攝徽縣篆徵兵籌饟徽民賴以不擾後以功授山東卽墨知縣上達洩任躬率丁壯闖栲栳島賊巢袖銅椎以往盜當之輒潰羣盜相

率以降卽墨自明季學校久廢上達以時勸課俾民習禮學詩俗用丕變修葺孔子廟堂籩豆干羽斌斌文教之邦登萊恆患蝗蝻自上達宰卽墨蝗蝻不復入境人謂善政所感云有子六人第三子崇徽官江西安義知縣

尹 誥字紫來武威人康熙辛卯舉人官四川渠縣知縣時朝廷方用兵烏斯藏芻粟皆藉人力負擔以往軍中令凡夫役輸糧至藏酌升斗按日給鹽菜銀差旋則不復給丁壯往往羈滯異域以死誥謀諸夫役於例運若干升斗外半其糧計每夫役二人可獲三人鹽菜則謹貯其贏者以爲歸來之資又捐俸每起夫役將至藏遴胥吏之愿者持銀繼其後俸夫役有津貼遂皆生還後團練鄉勇令下誥與民約富者入財於社供鄉勇雇履遂免役又躬歷行間課其勤惰民既無私爭拳勇亦倍於他郡縣後以勞卒於

甘肅新通志

卷六十九

人物志 羣材四

十

官

孫 詔字鳳書武威人康熙壬辰進士選庶吉士雍正初散館改知縣性伉直不能事上官多所齟齬久之 上有事於 先陵蹕經其邑天大雪雪積行宮門外數寸故事宮門內外糞除之役實宮監司之宮監有所索詔未允呼縣官來掃雪詔擁篲以前謂宮監曰縣官爲天子掃雪豈辱事耶僂僂掃不已宮監怒將羣集而毆之詔引其魁以出飭皂隸杖之是時上官皆伺候宮門外聆之震慄遂以其實上 聞且請罪 上覽奏欣然曰此知縣好膽宮監滋事不可赦著交所司治罪而 召見詔慰勉者再無何擢甯波知府旋遷紹甯臺道轉兩浙鹽運使進江西按察使詔慎於庶獄陞湖北布政使未及離任卒於南昌初詔守甯波兩浙累有大逆案 詔罷其省春秋貢士特設觀風整俗使宣揚 國家所

以激厲之意時宗丞奉天王某與總督彭城李某學使交河王某
交章上言浙人洗心滌慮痛自湔除復科一事猶未得聞以請詔
涖甯謂諸生以立品奉公爲上倚託青衿不急國課作四民倡罪
尤甚約於試士時俾有司覈報苟有通糧則停試俟其既完得從
有司具狀補錄學使行部至甯聞詔所行善之且令行之通省是
歲浙人之課爲天下最 上先已嘉浙人自新之速及聞樂於輸
將遂準復科浙人由是感之詔官浙時修復南宋六陵於祠祀義
士唐玉潛林白石外旁及王修竹鄭宗仁謝皋父羅詵且議毀楊
連貢珈泰甯寺而瀦之其發潛誅奸修廢舉墜大抵類此子爲璘
舉人孫備進士

高崇徽字雲甲康熙甲午舉人官江西安義知縣始涖任值歲歉
崇徽捐俸爲民完納錢糧安義城垣傾頽崇徽倡眾興修又修

甘肅新通志

卷六十九

人物志

羣材四

十一

孔廟修明倫堂工作頻仍不請帑不剝民縣中子弟有造輒招來
反覆訓誨崇徽忘其爲部民人亦忘崇徽爲官也後遷浙江安吉
知州瀕行老稚男女送者填巷衢婦人或脫釵釧投諸肩輿雍正
癸卯充江西鄉試同考官乾隆丙辰充浙江鄉試同考官皆能得
人考試江西時試題仕而優則學一節有一卷文思幽奧房考張
某不能句讀崇徽見而奇之遂薦焉正考官任蘭枝取中第一比
揭榜爲周學健江右名士也後成進士官至刑部尚書崇徽牧安
吉凡二年解組歸歸而教授里中子弟誘掖不倦崇徽沒里人思
之稱退山先生

張俊哲字穎我武威人由貢生徵爲旗學教習時從學者率皆勳
戚家子見先生不拜俊哲言於總裁官眾於是折服拜如禮無何
除河南開封通判俊哲涖任請葺糧道廢衙爲糧廳革從來藉差

病民陋規巡撫賈漢復以後哲賢可任艱鉅遂令攝延津縣篆延津地方六里兵燹之餘重以水旱彫敝逾於他縣俊哲洩任裁驛站私派及養馬草料幫銀定鞘槓夫役工食革莊頭柴車禁衙蠹市集抽豐銷河工隄夫每月換單諸凡有病於民振刷不遺餘力期月而復業者千有餘家縣大治祥符令王某暴殂巡撫某因祥符民請遂令攝篆祥符王令逋有帑項眷屬羈不能去俊哲代償官虧且助資送其妻孥南歸爲政一如治延津時修復祥符孔廟於泥淖中又纂輯縣志俾中州文物不至湮沒後解組歸卜築南山之麓謝客課子孫園中植名花百本徜徉其閒二十年足未嘗履城市年七十九卒於家私諡文惠長子我道諸生以孝稱賈攀鱗字昇霄武威人由吏員選山西平陽府經歷洩任值歲饑捐俸賑貸至再且勸富民出貲拯救全活無算上官聞其賢能檄

甘肅新通志

卷六十九

人物志 羣材四

三

監放他郡縣賑銀米攀鱗籌畫精當實惠及人民有立生祠以尸祝者又平陽地震豪暴乘閒剽掠知府王輔偕攀鱗日夜巡行城郭擒其魁寘重典民始獲安在官九年平陽迭遭重災而丁戶不耗攀鱗佐理之力實多雍正甲辰以勞卒於官貧無以殮百姓醵錢送其喪歸

張珞美字崑岩武威人雍正初孝廉方正官廣東惠來縣知縣德威兼施先是境內有巨匪大黃二黃踞百花山交通胥役久爲民害珞美洩任擒治大黃二黃并寘胥役之通賊者於法百花山以平總督某疏其事 上大悅驟遷廉州知府進雷瓊道以親老辭歸行李蕭然惟載書數千卷至家著書見藝文目錄

曾文受武威人官鎮標守備雍正元年番夷猖獗張義堡失守署守備史某棄城走文受以聽調西甯之兵奉文救援直抵堡斬首

百餘級生擒三十餘人以次剿滅卯藏天池等賊番所至皆捷斬獲無數士庶至今猶樂道焉

張爾戩字伯餘武威人雍正初孝廉方正本郡知府某薦其才官兵部主事後改官陝西同官縣知縣先是陝西州縣倉糧霉變著民代賠爾戩泣同官未幾上官有民賠霉變倉糧之令爾戩極陳倉糧霉變責在州縣官民既輸糧於官官不能防其霉變令民代賠是官卸責重征於民且民代賠不獲取倉糧而驗之勢將不霉變者亦以霉變著賠縱禡吾職不忍令民代賠爾戩以是被參仍著賠償倉糧乃已民願代賠爾戩謝之遂盡其室之所贏賠償倉糧於民無絲毫累尋援例還其官爾戩謝官歸窮陋以沒同官請入祀名宦祠

張 綸字錫公武威人軀幹魁傑美丰姿音吐宏暢見者詫爲偉

甘肅新通志

卷六十九

人物志 羣材四

三

人時 朝廷方用兵新疆有中貴人駐節武威與之善差旋值雍正初孝廉方正之徵致書本省大府薦焉官山東知縣遷濟甯知州有吏才民無枉縱後以獄或訐其有贓下刑部嚴鞫鄉人危之既廉實綸無贓鄉人乃服

張宗孟武威人性穎悟讀書過目成誦人目爲神童年十二爲生員一至陝西應鄉試見舉子肩行李伺候聽唱名慨然曰讀聖賢書當不於此求榮矣拂衣歸屏迹城市惟以經籍自娛尤肆力於周易殫思竭慮積十餘年著有成書年未三十以明經貢成均一日營生壙凡附身附棺之具罔不備飾並作輓詞自書之語家人曰吾將以某月日時死死則納吾所著書於壙中至期肅衣冠端坐而逝家人葬之如命時年三十三精於句股之法秋稼登場禾麥積如山阜宗孟練麻爲繩量其四周而計之斗石升合一黍無

舛著書見藝文目錄

蘇 暲字元暉武威人雍正庚戌進士官山西文水知縣以不習吏事罷歸設教於家說詩習禮一時文學彬彬鄉人稱雪峰先生爲文不尚藻飾而於聖賢立言之旨不一黍隔故武威言文於乾隆間宗仲山雍正間則宗雪峰以平淡論文而贈答之作乃復華美晚喜談禪有妙悟性質直對人輒露肝鬲不作時世周旋語又軀幹修偉食欲兼人類赳赳者鄉人爲之語曰蘇公不文李公不武李公者名萬倉官鄖陽總兵生平喜讀論語尤熟於史善談時致仕家居每里中伏臘有燕飲必推暲與李爲祭酒李援古證今吐屬淵雅而暲舉觴微笑言論不出桑麻晴雨皆高年耆德爲鄉人所矜式暲從子因植乾隆甲子舉人

劉述武字丕承武威貢生設教縣城之西偏邱祖庵言笑不苟教

甘肅新通志

卷六十九

人物志 羣材四

四

然以師道自任函丈間肅若朝廷於日課不稍假借述武家距庵僅百步每歸自庵衣冠儼然目不左右睨里人望而生畏鄉鄰有鬪者見述武來則各散去呼述武爲閻羅有過至相戒曰劉閻羅得毋聞之乎每午校閱諸童子所習字稍不端楷則以小杖擊其手積勞至嘔血卒無子弟子感其教澤皆白衣冠送葬哭聲振閭巷云

楊 翼字子鵬武威人雍正間拔貢與張珪美白暲齊名而翼尤倜儻工四書制義理真詞雅時場屋喜割裂四書語命題題往往棘手而翼文獨謹嚴每一篇成學者奉爲圭臬先是雍正初 詔郡縣各舉優行之士有司以其名上格於部試無所遇後主講太原得遍覽中條五臺諸勝胸次灑落爲文進而日上然不利科目以明經終子成棫字濟山乾隆丁卯舉人官鎮安教諭後薦保知

縣官陝西華陰遷雲南路南知州改江蘇攝篆江都補邳州知州以憂歸遂致仕成械所洩有惠政江都治績尤卓其民至今稱之周子蘭字晚九武威人性純篤孝親信友鄉鄰則之始設教縣城北海藏寺教極嚴從學之士跬步不敢苟後教於永昌堡以鄉曲子弟學每失時乃捐已所得館穀買田設義學爲延師之資其人感之立子蘭木主祀焉乾隆初由貢生官三水縣學訓導先是子蘭與尹思任友善思任歿子縮少值癸未大饑乃招縮至三水學署教之讀復以時存恤其家

馮世經字德薪武威人乾隆初拔貢以孝友聞工四書制義融會經史鍾鍊成文奇情壯采不可逼視庚辰大比偕其子白友應長安試白友領薦世經中副車白友後官山西夏縣知縣

潘 林字蔚之武威人乾隆初貢生官秦州訓導易直子諒在秦

甘肅新通志

卷六十九

人物志 羣材四

五

州凡二十年歷攝秦安清水禮徽各縣學篆多士愛戴始林從張觀察瑤美學瑤美仕粵東寄書教以敦尚實學於靜中理會聖賢本旨林佩是言終其身故於學粹然有所得

曾國傑武威人太學生兄國傑字御遴拔貢工辭賦國傑以善書與兄俱齊名書仿魏晉運筆圓美又有遒勁之致如武夫解兜鍪襲儒者冠服雖氣象雍容而赴趨若敵國侯著書見藝文目錄

景 瑞字聖圖武威歲貢生官合水訓導學行爲人所稱善書摹顏清臣得其似題榜字尤勝如端士跬步不苟又如賢吏莊以澁民望之清肅先是有郭正都隱於黃冠康熙初以能書稱繼是善書者時有其人若黨正王國輔蘇暲王三捷白清選孫大經王錄張棟等體非一家各有妙致他如趙昇劉丕曾書名亦甚著不曾藏唐宋明墨蹟尤富爲人謙謹且行善於鄉鄉人稱之

孫 備字仲山武威鄉賢文炳曾孫乾隆庚申拔貢居母喪廬墓三年讀書不輟時山左牛運震宰平番備喪旣除往從之學同門爲秦安進士吳澄狄道舉人吳鎮同邑生員吳懋德皆負雋才善詩文有三吳之稱備資不逮三人而苦學過之乾隆庚午領鄉薦辛未成進士官廣東翁源知縣性坦率不能事上官未幾罷去浪游江湖凡數年歸而從學者日眾備隨其材之高下而導之文各就乎範往往掇高科以去嘗語及門制義代聖賢立言非體會聖賢之理文末有不駁雜者至今陝以西言理學必曰孫西峰西峰名景烈武功人乾隆乙未翰林言文學則曰孫仲山其爲學者所推服如此子揆敘揆春揆亮揆章皆名諸生揆章能詩古文

劉 統字漢良武威人乾隆辛酉拔貢官直隸任邱知縣有吏才民稱其惠爲詩雋上七言尤多傑作

甘肅新通志

卷六十九

人物志

羣材四

六

李蘊芳字湘洲武威人父某業商而好讀書蘊芳承家學幼時已以該洽稱及爲秀才文章爲諸生冠乾隆壬戌中允胡中藻視學雍涼特賞蘊芳癸亥以優行貢於 朝且偕以往蘊芳旣貢太學考充旂學教習彌自奮於書無所不讀著述甚富客京師凡八年壬申春中式舉人其秋成進士仍留教習期滿除江西石城縣知縣有吏才民稱其斷簿書之暇猶著述不輟胡中藻官宮詹或揭其著堅摩集誹謗 朝廷遂罹重辟并及蘊芳獄成論死蘊芳著述凡數百卷會中藻獄起寄其書於同年某某以獄急焚之今所存者僅遺書二卷見藝文目錄子文字學山乾隆壬午舉人亦具出類之才早卒

楊鵬舉武威人少具雋才爲諸生領袖乾隆癸亥學使胡中藻行部至涼歲科試皆拔置鵬舉第一李蘊芳次之胡以鴻博自負除

甯夏編修路談外鮮所獎許及得鵬舉與蘊芳喜甚命從之往將
并以優行貢於 朝鵬舉偕行至莊浪辭歸曰學使日與蘊芳相
標榜輒謂當代人才無出其右夫損以滿招謙則皆吉吾恐從之
去於學無益反以取戾也蘊芳爲秀才負盛名比游太學聞見日
博已而成進士官知縣適胡以文字罹重辟蘊芳牽連得罪去人
咸服鵬舉卓識鵬舉辭歸後遭親喪哀毀成疾以沒

劉作垣字星五武威人父某生員教授里中子弟以寬里中稱長
者乾隆辛巳作垣成進士官安徽舒城縣知縣勤於其職而聽斷
明決民不能欺舒城有兄弟爭產者訟於作垣其家富有兄弟各
以財賂作垣作垣受其財而訟不之理兄弟之賂踵至作垣復受
之訟仍不理兄弟再多其金以賂作垣乃坐兄弟於廷出其前後
所賂財而責之爭產者始相顧而愕繼而相泣作垣返其賂兄弟
甘肅新通志 卷六十九 人物志 羣材四 十七

合好如初循聲大著擢泗州知州以讞鄰縣獄誅吏議歸歸而主
講肅州及本邑書院教尙嚴學者作止語默咸繩以禮法生平蚤
起雞甫鳴警欬已達戶外每扶杖省其私學者知所勸戒彼此激
厲以底於有成云

李承澤字肅徵武威貢生以學行見重於鄉一時人士樂從之游
雖童孺亦溫然恐有所傷生平未嘗妄毀譽人至今里中稱長者
必首數承澤

蘇文明武威人與承澤同時貢生工於制義應鄉試已被薦爲解
元以後場小疵黜人皆惜之教尙嚴及門畏若神明

劉光澗字亦西武威庠生始豐於財中年家落遂課徒以自養爲
人慈諒未嘗疾言遽色與人交久而能敬云

袁 柱字擎天武威庠生嗜學工文教授里中從學者多善士而

柱無操切之行同時明經馬文彩生徒亦稱盛文彩爲承澤高弟子字素先

李成年武威人世業農自成年以上凡六世未嘗異產逮成年其家男女至千餘指成年已讀書爲秀才於李氏齒德獨尊以勤儉禮讓治其家鄉人稱李氏七世同居必曰成年之教設教里中從學者百餘教毗於寬而不辭况瘁誘掖循循學者經其指授從容自化無束縛馳驟之苦由此武威西鄉文學稱盛焉從子濤乾隆庚子舉人勤於學其始爲秀才也年二十一成年嘗曰濤將以三十一舉於鄉四十一其死矣已而果然人竊異之

張興宗武威生員在棹子山策馬揮刀力救傅瑾等爲賊斫去頭皮馬逸免由是頂不髮

李作樞武威人世業農同產兄弟凡五而作樞其季也性樸誠粥

甘肅新通志

卷六十九

人物志

羣材四

六

粥若無能者自爲秀才卽教授里中子弟講習討論不憚煩苦然未嘗爲嚴苛之行人以是樂從其教而武威北鄉彬彬多文學之士矣始作樞不能治家人生產伯仲間或薄之而作樞敬讓有加終其身無怨色事親尤孝年四十以往晨昏定省孺慕不衰從子蕢生進士夔生舉人

王化南字蔭棠武威人乾隆乙未進士改庶吉士散館授知縣宰直隸廣昌靜海懷來洵陞山東平度州知州每到官必裁胥役之冗者嘗曰衙門內多一人百姓多受一人之累欲爲百姓去累當先於衙門去人刺平度大興水利民賴以生期年政成引疾去百姓送至泣下久之起爲莒州知州循聲益著革考試倩代積弊真才遂得後當遷爲直隸州而上官有欲因之取賄者化南艷然曰吾豈以財求官者哉卽日辭歸章淮巡道樹攀桂宰武威延化南

主書院講席無冬夏鍵書院外戶諸生出告反面矻矻孜孜俾不得斯須嬉士風爲之一變又諸生治經之餘日記歷史數則其在官也日必蚤起理簿書巳午閒聽訟晡則聚幕中客與子姪會食酒不過三巡座中或談經史或徵典或分題賦詩唱酬至再酒罷各就私張燈讀書聲琅琅相和家居歲必溫經史數過夜不讀書不寢也

王錄字心簡化南從子佃僕能任事化南宰直隸廣昌懷來靜海山東平度知州再官於莒皆錄爲之佐化南所至有能聲而錄不苟取佐化南有年無私財贏則購良書藏之喜讀書博聞強識善詞賦初錄讀書巳有造母氏楊守節以艱於一衿爲慮錄欲速成慰母心去而學射挽強命中遂入武學仍讀書不輟化南旣休官錄於宅旁僧寺賃小樓讀書其中嘗剪紙爲小番條記日所讀

甘肅新通志

卷六十九

人物志

羣材四

九

書以備遺忘數日黏滿四壁則揭去復條記如初見聞日廣辭賦益工學使每案臨武威考古學錄以武生請自試試必冠其曹乾隆丁亥學使吳綬詔以蒙古包賦大雪寺五代鐘歌試諸生錄作先成學使賞其宏富遂除武生籍改隸文學拔置高等爲廩生彌自奮書無所不窺而尤熟於文選旁及北堂書鈔白氏六帖藝文類聚諸書性伉爽能解紛鄉鄰曲直賴其一言而判然未嘗妄是非人鄉人敬焉嗣子曰敬武生孫三益嘉慶辛酉舉人

張翺字鳳颺武威人乾隆己丑進士戶部郎中後官長沙知府爲詩力追盛唐五言尤工沈摯於子美爲近同時有薛漸遠亦長於詩音多愁苦而思清語雋一時傳誦漸遠名一鴻拔貢著書見藝文目錄

張棟字松生武威貢生父延慶武威稱善夫先生者也有神童

之目由明經官鳳翔訓導乾隆甲午舉於鄉父子並負時名延慶垂老始博一第而棟凡十五入秋闈無所遇通醫卜醫尤精求者屢盈戶診視無倦容不善謀生產老而彌窮與人偶論王安石行新法事棟敷陳新法之弊且說且怒怒不可解則大罵拍案竟滅其燭聽者遂引去至戶外猶聞棟罵不休棟喜論史而論及李林甫秦檜嚴嵩一輩人輒罵其痛惡奸諛如此病中命季子鑑源爲讀明史聽之病革猶對客作戲謔語

蕭士雙字無雙武威人生而聰慧讀書日可萬言七八歲屬文無支語乾隆己亥領鄉薦甲辰成進士客都下久乃益交游四方人士章淮樹攀桂自武威合驟遷江甯知府士雙往依焉寄游江湖凡數年旋里家居未逾年河州總兵某以厚幣聘爲其子授舉業士雙斤斤禮法自繩造次未嘗或苟書法遒勁詩清脆欲闢晚唐人之室惜隨手散去

甘肅新通志

卷六十九

人物志 羣材四

三

尹 綰諸生少孤入庠後爲童子師藉館穀養母設館城南街黎明即起據案核生徒所習不少懈雖疾風甚雨如期至館乾隆丙午以後生徒輒掇高第里中子弟來學者眾館舍至不能容簷下溷旁皆書案生徒苟貧乏不責修脯人以是感之門下先後成進士者原武知縣郭楷禮部郎中周泰元翰林編修牛鑑其登乙科則劉曖趙可後郭樸張沆由明經官京師則刑部主事張夢齡子三人世阿乾隆乙卯舉人官江西庫大使世衡嘉慶辛未進士官吏部考功郎中世清由蒲城訓導中式乙酉舉人

張大烈字子節武威貢生陝西邠州學正諸生執贄來者量其有無受之巡撫畢沅聞其賢且以年八十以上招之應秋試遂援例賜舉人一日畢延大烈於署後圃呼其子出會文大烈文既清

新書法端謹且先成畢覽之大喜曰此真老師矣厚禮之居無何
畢語大烈曰吾固知若貧士吾將以五百金助若若應禮部試以
年例可得翰林檢討大烈辭焉既歸里舉行鄉飲酒禮推大烈爲
大賓進退揖讓德容睟然鄉人望而敬之始大烈爲明經家居從
子婦病爲鬼物所憑嘍語嬉笑無常一夕大烈肅衣冠坐堂上子
孫行列左右階然巨燭堆冥鏹門外縛病婦出而數之大烈頤而
哲嘆喏美鬚髯面冷如鐵陳說幽明理甚辯病婦跪階下稽顙不
已額至出血左右髮皆豎大烈忽大呼曰去矣病婦遂仆於地命
掖以入解其縛而焚冥鏹滅燭各就寢越宿而婦病若失鄉人後
述審鬼一事赫然張大烈在也

張聯珂字介璜其先安徽鳳陽人明初有張奇鸞者從藍玉平甯
夏有功世襲指揮同知居武威遂家焉明亡應替雍正間祖君烈

甘肅新通志

卷六十九

人物志 羣材四

三

以軍功官松江總兵 上稱有督撫才年未五十卒廕其子堂通
判聯珂君烈嫡長孫也父堂豪放揮霍不十年家資以落而禁約
子弟獨嚴聯珂先亦不羈惟奉父教謹且從劉丕承明經學學遂
有成爲名諸生喜讀史書歷代事言之鑿鑿又善誘童蒙容飾修
整與人言上下今古號稱博學者無以難也性倔彊意所不樂百
口解說不爲動獨於邑中耆舊言論行事多所稱述云年八十二
卒

林起鵬字介雲武威貢生始豐於財父明經某謹厚生起鵬兄弟
凡三延同里貢生何天民爲之師何故名宿爲制義有法度起鵬
經其指授化場屋排比之習獨標超曠後益肆力經史起鵬學旣
成其父遇天民有加禮事每先其意而爲之籌何適喪妻時年髮
無子復無期功子子之起鵬父以起鵬女弟歸焉踰期有娠而何

卒卒數月果舉男乃取來同爨起鵬視其子若己兒撫之成立名承先乾隆乙卯解元嘉慶乙丑進士改庶吉士散館授知縣官安徽長泰縣知縣起鵬因供承先家益落後承先沒於官起鵬哭不成聲曰凡吾所以成梅生者祇以報吾父命爾吾不惜吾窮獨惜喪吾梅生則大哭哭數日連呼梅生而絕承先小字梅生何承先字美承一字梅生武威人乾隆乙卯舉人嘉慶乙丑進士選翰林院庶吉士散館授知縣官安徽長泰縣知縣承先初喜讀經兼及秦漢唐宋諸大家文融會其理趨步其局陣襲其風神以是發爲文章非復尋常蹊徑

王國楨武威人父掄書業負販而性誠篤不欺國楨以門戶計不克卒讀延明經趙希聖課諸季讀禮貌必恪修脯必豐酒食必時鄉人於是稱國楨禮有餘而情未嘗不足也嘗手一編坐廡下披

甘肅新通志

卷六十九

人物志 羣材四

三

覽不輟通史學往往與客論古政教之隆汙人材之消長與夫疆域沿革年代變遷如數掌上螺紋國楨年五十以往資產遂匱而諸季皆能騫騰擢科第馳名譽於時國祥諸生國祚由乾隆壬子副貢中式嘉慶辛酉舉人國祺嘉慶戊午舉人國禔諸生

武登第武威庠生幼穎悟從塾師讀甫及期已能屬文酷嗜載籍家貧無藏書偶從鄰家借史記讀瀏覽一過鄰家索原本去登第窮日夜默寫成帙不一字譌其彊識有如此者嘗疊石爲陣大如几案捕鼠雀納其中雀準其壁壘上下飛鼠則奔突若迷所向者人以是知登第通兵法也

張 瀚號介侯武威人嘉慶己未進士選翰林庶吉士改官陝西武功知縣有惠政澍於書無所不讀學問淵博精考據爲海內名家駢體文尤推正宗著書等身其刊以行世者見藝文目錄

李 洞字酌雅武威人其先世習耶穌教父某以戰功官廣東游擊猶習其教不改始洞亦習之比其父卒於廣東洞將扶櫬歸葬而他人溺於耶穌教者則曰屍可棄也萬里外將一陳死人去胡爲乎洞惻然曰耶穌教之弊一至此哉烏哺而獺祭吾豈不禽獸若乎於是踰海沿漢跋涉經年奉父喪以歸歸而葬祭盡哀盡禮鄉鄰大悅而諸李習耶穌教者譁然斥洞爲叛教將劓刃於洞洞不恤也洞自是奮於學嘉慶丁卯舉於鄉丁丑會試沒於涇州旅次洞之子弟無復習耶穌教者矣

毛 暈字雲亭武威廩生爲人謹於禮法居家尤儉冬夏衣褐冠不至敝不更歲大比必至戊辰撤棘之次朝將西歸而向同邑潘挹奎貸錢千挹奎少之則曰暈策蹇往還費僅需銀十兩頃從碑林購唐人墨搨數本遂有此虧千錢足了吾事矣武威至長安來

甘肅新通志 卷六十九 人物志 羣材四 三

去計程逾四千里入陝賃客寓投卷治場具所在耗財暈所需乃至此其儉有不可及者潘挹奎戊辰領鄉薦暈謂挹奎曰暈固許君將大成暈今所喜君他時可作一好官急轉語曰所云好官非多得錢之謂相與失笑

趙相南武威庠生爲人樸訥而讀書之勇倍於常士肄業本郡書院閉戶默識不與人酬接人闖其室相南喃喃背誦所讀書或有問亦不答嘗謂理與法具乃可言文揣摩風氣之說吾甚不取吾惟守吾法以闡聖賢之理而已

嚴謙德字牧堂武威人事繼母以孝聞讀書穎悟而有沈潛之力既爲秀才入關中從岳震川學震川謂謙德苟不變所守可到聖賢路上去爲所見重如此未幾病痢卒

關志友字益三武威人幼喪父育於叔氏叔賢而志友能讀書以

成叔志爲人謹厚居家睦於兄弟交朋友言或恐忤朋友樂與之往還座有志友則羣聚而譁之志友惟笑荷荷不休中式乙科副榜入關中肄業學日進結納日廣比返里里中爭延爲師

徐之科武威舉人勤於學嘗讀書於其別業之小樓諷誦之聲往往達夜過者傾耳聽之無何病卒士論惜之

張美如字玉溪武威人嘉慶戊辰進士選翰林院檢討善書邑人藏張氏書者頗夥

李夔生字典臣武威人父作賓處士喜讀宋儒語錄持躬端謹世父作樞鄉居授徒夔生幼承家學嘉慶癸酉優貢成賓舉於鄉生平篤於友誼然不輕與人交苟心許則生死以之蚤歲與永昌蔡發甲善發甲以進士官山東知縣夔生往佐其幕發甲因事左遷身沒貧甚子幼夔生爲請於蔡之同官旣清宿累餘貲數千挈孤

甘肅新通志

卷六十九

人物志

羣材四

五

載樞歸嚴寒風雪中敝裘一襲徒步走六千里世咸高其義以比戴平仲繆豫公云

牛鑑字鏡堂武威人嘉慶甲戌進士選庶常改官編修充史館纂修累轉刑科給事中出爲雲南糧道擢山東按察使遷順天府尹授陝西布政司調署江蘇巡撫明年授河南巡撫道光二十六年英人犯順兩江總督裕謙戰沒海疆事棘上擢牛鑑繼其任

明年五月軍潰吳淞口夷艘逼江甯受撫退於是言路交劾牛鑑被逮下獄論死時河南財政奇絀計臣窮於搜括朝廷以鑑撫

豫有恩赦出給主事銜發往募集捐款事竣放歸咸豐間捻氛熾復被召至汴授按察使旋乞歸卒於里年七十四先是鑑以道

光十九年九月涖汴勤求民隱二十一年二月間河督葉毓英卒於工鑑兼攝河篆桃汎安瀾五月中大雨兼旬陝州萬錦灘黃河

半日之間陡漲一丈上南廳祥符上汎三十一堡灘面汎漲漫口二十餘丈衝破護城隄直灌省垣四圍水高丈餘五門堵塞未幾南門穿漏城中積水深三四尺不等其不被淹浸者東北夷山一帶而已商賈罷市刁匪有乘間肆掠者時鑑在工次聞警乘小舟抵城縋而入立擒首惡實諸法區處防賑各事宜人心稍定有議拆上游隄堰使水趨中牟救省城者鑑堅執不可爲文誓於神議始寢又三日大溜全掣由漫口入改道循護城隄向西南曲折而東皆離城三四里刷成深槽奪渦河以去而祥符以東正河斷流紳民額手謂鑑一念之誠足以障狂瀾於既倒云新 簡河臣文冲抵任凡咨調河員及稽料賴鑑血誠動物官民一心一時廢廟民房購撤殆盡外拋內餞並聯大舟挂城四面以禦風浪卒能保全百萬生靈及城池倉庫城方險時嘗大雨一晝夜北風掀浪西

甘肅新通志

卷六十九

人物志 羣材四

五

北城角忽穿成巨竇圍數丈水湧如漢鑑向陷處跪且哭且祝眾皆跪俄而水頓縮急以輓石補之得無恙後水勢漸落文冲坐不救護省城禡職荷校河干遺篆 命欽差王鼎兼攝方議塞決口挑引河而兩江總督之命下百姓數千人守院署方遣人走京師擊登聞鼓乞留而鑑夜踰垣出城矣比知守者皆哭沿途百姓焚香追送不絕

潘挹奎字石生武威人嘉慶庚辰進士官吏部考功司主事邑志久失續修文獻無徵挹奎表揚耆舊勒成一書文筆雋逸學行端謹後進勵品節者咸奉爲圭臬焉著書見藝文目錄

李銘漢字雲章武威人道光乙酉副貢始議修堡人弗聽及回變欲爲堅壁清野之計已猝不及辦縣令朱某用之卒平土回之變丙寅正月提督永順楊來先議團鄉兵與請客兵孰便銘漢以一

言決之始用客兵其籌饟也入諫提督出勸捐戶悉中其要此外如調番兵援肅州銘漢皆先事獨抒己見知府龍錫慶來攝涼郡數詣諮商政事請豁免水衝地糧及議除更名糧以龍移守甘州不獲行戊辰八月寇氛息大吏上其事得中書銜銘漢性廉取與一介不苟弱冠喪父柩鄰僧舍有反風滅火事業師尹保臣沒有貲寄豪某家謀乾沒至無以庀喪具銘漢帥諸文學訟言攻之盡吐乃已其爲學出入經史以及天文算數輿地兵農皆能宣究疏通而發明其所以然尤精於聲韻訓詁冥悟深造持論不爲苟合著書見藝文目錄學使胡景桂疏薦加國子監學正銜子于錯由翰林改官知縣特擢知府

劉開第字夢惺武威人同治壬戌進士官陝西知縣歷署臨潼涇陽各縣事先後兩任醴泉有惠政值歲饑捐八千金治賑活民無

甘肅新通志

卷六十九

人物志

羣材四

三

數會省使至勘災索賄開第以災亟拒不與使者譖諸大府議旨賑不實左遷教職去之日老幼攀轅感泣不釋既歸主講雍涼書院成就後進不少著書見藝文目錄

趙元普字施仲武威人學問淵洽取與不苟同治庚午舉人官秦安縣訓導以性情孤介不儕流俗棄官歸主講天梯書院多所成就有書癖見佳文輒不忍釋藏書甚夥臨終盡以書遺諸朋友著書見藝文目錄

權尚綱字錦堂武威人爲諸生時嘗徒步數十里抵郡城應文社課辨色往迨暮乃歸如是者十年薄田數畝耕耘藏穫恆與傭保雜治之輒足塚手骨骨不少休一布衣十年不易光緒壬午舉於鄉後用史館膳錄議敘知縣未及銓卒於京師尚綱少從李銘漢學銘漢勤謹賁更僕不倦尚綱退必書於冊道京師凡山川名勝

所遇琳宮梵刹古碑字可識者均默識於心歷久不忘
楊桂英字登蟾鎮番人明崇禎十二年功貢歷官鎮江歸德保定
三府通判陞山東濟南府同知旋陞江南安慶府知府英敏強幹
才能著聞子鳳翼歲貢生

段可舉鎮番人明崇禎十三年功貢官山東海門縣知縣鼎革後
棄官歸里順治五年與何孔述朱運開勦回有功

何孔學鎮番鄉賢孔述弟明崇禎十五年功貢歷官北直楊村通
判左遷浙江按察司經歷調海鹽知縣鎮番沙壓賠糧甚多孔學
剴切陳之御史某奏免三千餘石

孟良範字元淑鎮番鄉賢良允弟明崇禎八年拔貢官湖廣咸甯
縣知縣以才幹稱陞兵部員外郎時兄良允戶部主事兼兵部職
方司主事人呼司馬兩郎後歷陞湖廣上荆南道順治四年回籍

甘肅新通志

卷六十九

人物志 羣材四

三

終養康熙五年起復補廣西泗城府同知卒於官

王子香國柱子守備歷官至延綏都司順治五年勦回有功

朱運開字文天鎮番廩生順治五年逆回丁國柱等嘯聚秦隴甘
山眾號數萬回黨帖清泰逐鎮番參將自立時邑廩生何孔述密
謀於運開欲約被脅之張龍門爲內應運開以反聞計赴甘挺入
回營卑辭媚賊潛約龍門歸語孔述卒成大功

王慎言鎮番人順治六年歲貢家貧耕讀自樂闔郡舉優學使以
澹臺原憲褒之年九十餘壽終

楊端憲字遵度鎮番人順治十四年舉人從靖逆侯張勇征吳逆
叛黨馬洪王輔臣以功授知州歷四任旋改工刑二部郎中歷官
至浙江甯臺道治績卓著尤沈靜有大度不爲矯飾之行宦游四
十餘年歸惟圖書數篋而已

謝名魁字斗垣鎮番人順治十七年武舉善騎射曉暢兵機以軍功授湖南長沙千總

劉蔭芝字仙圃鎮番人順治十七年舉人歷任岷州衛教授以吳逆將亂棄官歸里躬親穡事筆墨與偕有感則隨興題詠年八十三卒

康伯倉鎮番人訓導來慶會祖年九十四神氣充固言行可風鄉人欽仰之

楊國謨字瑞芝鎮番庠生年九十餘步履輕健樽酒徜徉嘗與文學後進飲宴極樂醉後藹藹如春

劉士藻鎮番人年九十餘起居強健以紡織爲業每過其門機聲不絕

張奇斌鎮番人學問淵博康熙丙午舉於鄉五策涵今茹古殫見

甘肅新通志

卷六十九

人物志 羣材四

天

洽聞主司極爲歎賞特蒙拔擢以厲實學後官福建平武縣知縣孫克恭字敬涵鎮番人康熙八年舉人從張勇征吳逆有功授隴西縣知縣改授山東禹城縣旋授廣西平樂府同知所至咸有政績著書見藝文目錄

何 鈇字鑑開知縣孔學子康熙十一年拔貢從張勇討平涼以功授鎮原縣知縣改浙江嘉興縣知縣後補福建古田縣知縣以祖母年老陳情終養家居課子鈇風度和藹而崇尙意氣更才敏捷爲當道所推尤精書法得者幾於一紙千緡云子緒浩廕監生李愈桂字月賓鎮番人康熙十一年副貢嘗從征吳逆後歸家以親老不仕尤善啟後學邑之顯達者多出愈桂門下

吳攀桂鎮番人少聰穎讀書過目成誦博通經史康熙十一年副貢從征王輔臣以功授安定縣教諭改固原學正旋陞西安教授

子仲義舉人官知縣

張其蘊鎮番人幼習韜略慷慨有大志康熙十四年由武生從振武將軍孫思克出征吳逆積功授辰州營水師守備十五年復從振武將軍討叛臣王輔臣於平涼以功改授湖廣岳州水師營守備二十三年征紅苗二十七年征夏包子俱以戰功顯三十九年歷官神木副將四十六年擢雲南臨沅鎮總兵雲南自孫李竊據後兵燹荼毒民戶流亡我師入滇卽以從征者分駐其地久之生齒日繁糧仍故額軍有艱食之苦其蘊出貲捐金穀分貯三營自是婚喪有資軍不告匱五十三年臨沅大饑其蘊檄各屬發官米萬餘石減價平糶四閱月全活無算沅人德之五十五年卒於官詔賜祭葬從祀雲南名宦祠子先志隸長安籍

李士達字通庵鎮番人力能舉百鈞初爲涼州鎮標校尉康熙十

甘肅新通志

卷六十九

人物志 羣材四

三五

五年從振武將軍孫思克征王輔臣會黃河橋斷士達率兵由蔡家口跨皮筏夜渡次南岸我師僅二百人平明周環悉皆賊壘士達奮戈先登從者繼之連戰連捷威名大振思克疏薦爲守備十九年吳三桂僞將譚洪彭士亨據川東士達復從振武將軍爲前敵進攻靈鷲寨寨峭壁深塹士達率精銳三百人緣小徑出其後夾擊賊兵大亂相蹂躪死者無算後師還授提標前營遊擊嗣黑山湖逆犯順士達率兵驅之敵望旗卽驚走又有酋長名卜吉者自歸化城來寇士達率兵自昌甯湖追逐斬梟帥而還未幾上詔見瀛臺命士達射連中三的甚嘉之特簡爲天津總兵未赴任調古北口總兵旋調甘肅鎮總兵官都督府二十六年王師征噶爾丹命士達出勦時士達病甚乃力疾出塞行至希呢兀素夜有大星殞於營士達遂卒詔賜祭葬封榮祿大夫弟士祥肅州

鎮千總子桂歲貢生官慶陽府訓導

彭樹林字玉君鎮番人起身戎行酷嗜學問當時稱爲儒將康熙中與李士達同隨孫思克出征其戰功與士達埒後由千總陞陞川北鎮游擊嘗以少未讀書爲憾遇文學士倒屣相迎有授以明心寶鑑一書者樹林苦心探索卒能貫通其義身體力行教子惟以書史一切弓矢劍戟之具每痛戒之後致仕卒於家

唐廷模字工亮鎮番人與李士達彭樹林從振武將軍出征茅麓有功又從討馬洪王輔臣同爲靖逆侯張勇部下驍將二十七年積功官下馬關參將晚年 予告歸里農圃逍遙二十餘年卒

李桂馨字蟾枝鎮番人由武生與弟永齡從振武將軍征馬洪於蔡家渡討王輔臣蔡元於虎山墩所過秋毫無犯以功授響水堡守備陞陞黃甫川游擊旋改白土關游擊惟以好士論文爲務凡

甘肅新通志

卷六十九

人物志 羣材四

三

有益軍民事或慷慨詳請或獨力擔荷故所至人皆戴之弟永齡千總子蘭以忠烈著

閻錫璜字黃玉鎮番人氣度冲融講學論文不尙新異後學皆師事之康熙三十一年由拔貢舉於鄉官西安府臨潼縣教諭歷任秦州乾州學正

盧生華字文錦鎮番人康熙三十七年拔貢五十一年舉於鄉工時藝適川陝總督某觀風全秦生華同弟生蓮生薰生莢俱列高等傾動河西總督特加獎賞會題開大學生華生平善啟後學諸弟聯翩科甲子姪接踵入泮皆其陶甄郡邑之士聞風而至者咸執經請益以故多所造就焉著書見藝文目錄

侍 彤字廣颺鎮番人積學能文康熙五十一年川陝總督某觀風全秦彤與盧氏昆仲俱列優等特蒙獎賞一時鎮邑文風之盛

傾動河西會逢 詔廣學額總督與學使會題開大學形與有功
焉先是四十一年舉於鄉官同州學正陞甘州府學教授

盧生蓮字文潔天性純篤博學工文康熙五十三年鄉試破額中
式士咸欽仰之雍正十一年成進士後官江西弋陽縣知縣嘗與
兄生華同輯縣志

盧生薰字文馥生而穎異八歲能文康熙五十三年兄生蓮領鄉
薦生薰以率額見抑中副榜雍正元年與弟生莢同舉於鄉二年
成進士選翰林院庶吉士性冲淡每值史館公集呐呐善下未嘗
以意氣自豪若尹望山陳榕門帥蘭皋張晚樓王罕皆諸鉅公層
推重之

李紳南字鵬峰鎮番人康熙六十一年歲貢行方學篤官新渠縣
訓導乾隆十五年地震廢新渠改隴西縣訓導子爲濂官訓導

甘肅新通志

卷六十九

人物志 羣材四

三

蘆生莢字文衡品優學富諸昆齊名雍正元年與兄生薰同登鄉
榜以家學教授生徒士無遠近皆宗之如山斗其藉所傳以達者
尤不勝數子榮 恩貢生

康來慶字茨如鎮番人雍正三年歲貢體度敦重言行有法尤善
啟後學縣南鄙蔡旗堡士習樸魯堡民延來慶爲師來慶乃聯文
社立學舍生徒嘗數百人凡二十餘年多所成就乾隆八年官合
水縣訓導曾孫繩武知縣

王有德字慎先鎮番人雍正八年進士官山西榆次縣知縣旋改
湖南湘鄉縣知縣持法明允民無冤滯有廉惠聲後以抗直不諧
於時遂解綬歸晚年勸課耕讀尤多所成就云弟衣德舉人子其
仁歲貢

李爲濂字臨溪訓導紳南子性冲和文辭優贍雍正十三年拔貢

官藍田縣教諭弟爲綱文藝純正與爲濂齊名乾隆十四年歲貢
官富平縣訓導著書見藝文目錄

劉叔堂字子升指揮清裔穎悟有異才學問詳該文思敏速乾隆
元年成進士授刑部山西司主事後改江南江都縣知縣旋調寶
山縣知縣有惠政卒於官

盧 賢字杲如鎮番人乾隆六年舉於鄉三十一年官涇州學正
三十八年陞湖北長陽縣知縣民心愛戴有循吏聲後解組歸里
設帳授徒多所成就年八十一卒孫金潤誠篤好學言行恂恂嘉
慶六年舉人

謝錄朋字友賢鎮番人乾隆七年歲貢家貧好學性方嚴不苟設
教里塾生徒知名者甚眾當時推爲祭酒云

潘純德字懋修鎮番舉人官甯夏縣教諭毅然以師道自任本郡

甘肅新通志

卷六十九

人物志 羣材四

三

經歷某因監修渠工誤扑諸生純德以士不可辱爭且不下同
城自巡道以下爲之緩頰經歷某詣明倫堂謝過且爲諸生謝爭
乃息士以干城學校伐石紀其事及純德沒諸生相向而哭若喪
所親先是純德構精舍於宅之南偏左右圖史朝夕諷誦尤慎擇
交生平稱莫逆者詩人秦安胡鉞同里劉統

潘中吉字靄如純德子乾隆甲子舉人除沔縣教諭遷慶陽府教
授以憂歸服闋選鞏昌教授三爲學博士論翕然稱賢而於沔縣
訓課尤嚴沔人至今德之官鞏昌時由舉人行取知縣任山東卽
墨縣抵任謂酗酒賭博爭訟之端而盜命之藪也設法治之積習
爲之頓改乾隆庚子春 上南巡躡經山東中吉承辦行宮於常
所供張外未嘗增華以耗民財上官復派協濟眾興集驛馬牛棚
中吉日是將重勞吾民也捐俸供之後縣有冤獄已解勘咨部中

吉訪之得實將平反或以被吏議沮中吉中吉曰惜一七品官與殺一無辜孰重卒請更正宰卽墨時邑人尚書郭琇之孫名斐者守甘肅西甯坐屬官冒賑將籍其家中吉以尙書居官廉明後人不宜罹慘禍多方調護之其家賴以不毀著書見藝文目錄王象已鎮番人乾隆十年歲貢官鎮原縣訓導教士有法時有奸匪不靖象已以法鎮撫之保全甚眾大府異其才擢授江南休甯縣縣丞

嚴克和字秩如鎮番人乾隆十七年舉人言行篤誠文藝純茂由軍功以教諭擢鳳翔府教授

謝王賓鎮番人少經商性耽經史年四十餘構屋三楹藏書數萬卷坐卧其中日事絃誦垂二十年未嘗身履廛市其操行尤嚴弟姪子女皆教以禮法鄉里咸引重焉子履齋廩生履泰孫庸庠生

甘肅新通志 卷六十九 人物志 羣材四 三

何遠烈字近涵鎮番人修髯絕倫容止端正性嗜學少補諸生尤工書法嘗設帳授徒成就甚眾生平矩步規行言笑不苟士林欽之子培誠庠生培魯貢生

嚴克炤克和弟武生性耿直不阿時好凡遇地方公事輒勇往仔肩嫌怨不避居家訓子弟尤嚴義方居鄉排難解紛有爭詬者咸取平焉其爲閭里推重信服類如此

王宏善字協一鎮番人天姿逸宕博文強記貫通經史爲文奇麗不羣乾隆十七年進士官同州府教授後歸里教授生徒有矩法遠近咸宗仰之

康繩武字祖昭來慶會孫乾隆三十三年舉人性剛正純篤不阿時好亦不作欺人語四十六年大挑廣西知縣粵中故多瘴癘人或以危險難之繩武曰昌黎赴潮東坡過海身爲國用耳遑恤其

它遂毅然去不顧歷攝來賓永甯西隆等篆儉慎勤廉所在咸有政績五十一年補容縣知縣鋤暴安良民心愛戴後解組歸晚年構小亭曰退思優游林下二十餘年從不入官府子以直舉人段學南字道然鎮番人形貌魁梧膂力過人乾隆三十四年由武進士授貴州水城營守備嘗從征金川屢有戰功歷官至河南撫標參將旋以功擢直隸三屯營副將卒於官子蟾桂由武舉官涇州千總

馬世玠字玉章鎮番指揮福裔幼岐疑豁達不羈而奮志於學乾隆辛卯舉於鄉爲文力追先正不屑一時妍好子肇運拔貢丕運

恩貢

謝葆壽字雨甘鎮番人訓導整于乾隆辛卯舉於鄉丁未大挑分發山左歷任益都臨朐諸劇縣皆有聲尋補安邱令其治主於崇

甘肅新通志

卷六十九

人物志 羣材四

書

學校以厲俗鋤強暴以衛良立法嚴明恩威並濟尤長折獄郡邑有要案當道輒檄委案讞多所平反罔不明允己酉分校鄉闈所得多名宿會學宮傾圮邑志缺殘奮然曰此守土之責也遂倡先捐廉次第就理縣東北鄭公鄉爲漢儒鄭康成故里田被沙覆戶口逃亡力爲申請蠲賦招之以歸全活甚眾甲寅大計巡撫某以治行第一薦尋以憂歸服闋謁選卒於京邸子集成舉人官陝西鄜州州同集梧舉人

張爾周字筱莊鎮番人道光庚戌進士官四川知縣署夾江長壽等縣補仁壽縣以憂歸服闋改官陝西歷署西鄉紫陽甘泉補蒲城蜀俗凡官下車胥役有夫馬費代書有截費爾周皆擯卻之夾江有棉肆上官遣官徵釐稅爾周爲婉請薄征後竟白罷之去任時商人醵金爲贖卻之不可乃留置書院以資寒畯涪州鶴遊坪

之亂長壽與之接壤爾周率民團赴州界擊賊擒匪首周章義等三十二人事平籍叛產若干畝計直三千餘金盡歸之書院仁壽訟繁吏猾宿弊蕞積爾周立簡明堂規區別新舊緩急分日受獄又爲籌命盜巨案相驗招審諸費緣舊日皆取諸地鄰及盜所扳引指稱窩主寄贓之家爾周籌的款備用而地鄰及被扳者皆免科派上官以其法下之他州縣藍大順之亂圍井研踞資州遂入仁壽境爾周練團防勦令民擇險築砦移老弱貴糧居其中賊無所掠食卒不得深入後論并研解圍功保薦以同知候升西鄉紫陽皆陝西南山巖邑簽匪不時爲患爾周申嚴保甲聞盜卽會營往擒鄉閭賴以安堵嚴禁糧差不許截墊地丁民得免倍償之苦甘泉瘠土久旱爾周請司庫銀千兩開渠溉田使飢民傭力自活及涖蒲城則賑已竣而饑孳猶纍纍相望爾周以憂勞卒於任

甘肅新通志

卷六十九

人物志 羣材四

三

馬明義字鏡臺鎮番人同治壬戌進士官湖北知縣署枝江縣時旱蝗交集哀鴻遍野明義用意撫綏民賴以安喜接見士民於胥役則嚴加約束不肯稍假有鐵面冰心之頌去任時父老攀轅而送者數百人

魏持國鎮番農民同治回亂聯絡四溝堡寨率眾拒賊保全危城鄉人皆感其德年八十三無疾而終

邱爭榮鎮番庠生同治十年逆回猖獗寨陷爭榮與汪積翰出重圍冒鋒刃奔往賀蘭乞援於嵩武軍遂逐逆賊鎮邑咸德之

黃應堂字玉如鎮番廩貢生豪俠好義乙未河湟不靖甘涼戒嚴築城爲備南城郭門上有文星閣勢高峻議者恐寇階以登爲城贅疣欲折毀將舉事應堂力阻之謂閣卽城之保障可以居高明遠眺望登陴堵與城互應今毀之示怯也且矢外藩願以身家爲

質事遂寢城卒無恙

鄔俊彩字子彥永昌人明指揮僉事朝冠四世孫康熙中武進士選江西羊角營守備旋調入京改守湖北沔陽衛掌印時軍民田賦不均屯丁多積逋俊彩詳邀清丈獲免宿欠四千餘金又以水浸乞賑蒙報可後督修漕船毫不累民沔人戴之

陳拱璧永昌貢生遇事能任康熙間邑出下川驛頭銀壹萬餘兩百姓苦之拱璧挺身上訴卒蒙恩免子詳周於雍正九年在潘學使案下請廣學額得加進四名永爲定例至乾隆間又苦牛本銀兩之害富者無甯日貧者鬻妻子眾欲訴免卒難其人適巡撫李世堯按部至永風規甚肅人莫敢近拱璧孫天蔭慨然欲往遂伏道左攀轅呼訴世堯叱之曰此眾人事爾一人來不畏死耶天蔭對曰如蒙恩免請願捨一人之命以救眾人之身世堯領之卒蒙

甘肅新通志

卷六十九

人物志 羣材四

美

蠲免

祁朝相永昌人丰姿俊偉膂力過人以武功任靈州參將康熙三十一年率師攻厄魯特大敗酋長噶爾旦追奔三十里馘其部二千餘生擒數百 上嘉乃績 賜御書授拖沙喇番 召見將大用甫入都以病卒子模承襲

馬爾值永昌明鄉賢應龍曾孫由軍功任東川游擊康熙四十年滅打箭鑪論功第一 賜蟒衣遷山西永甯鎮進都督同知

南宮鼎字德宇永昌人明世襲指揮魁四世孫讀書有夙慧舉鄉試第四遂登進士教授岐陽勤於訓課士咸宗之性耿介與鄙合某爲同年友極善某生者鄙富室也與人訟弗直持三百金至乞一言宮鼎遽怒揮其金於門外叱使去生平行事類如此

郭永泰永昌人 恩貢生性敏好學至老手一編不輟人有所問

靡弗能應年八十餘卒子興尙舉人

陳登甲永昌人乾隆丙辰武舉性友愛喜子弟讀書其堂弟登鼇嗜學登甲躬親家政俾登鼇專心肄業蘭山者十年後登鼇食餼以優行貢人多稱之

秦 睡永昌人監生幹練有爲乾隆閒西域軍興辦理輓運等事官民均賴

謝弼漢字孟子永昌乾隆癸酉舉人教諭甯夏善治渠後薦授龍里令慈厚清謹士民胥悅邑例貢茶採諸巉崖削壁歲斃數人弼漢力請除之當道不可由是有去志後因逸犯事遂罷官貧不能歸家給資斧乃還

陸建衡永昌人山西靈邱參將狼山夷反建衡徧察地形設伏用奇大破之事 聞賜拖沙喇哈番

甘肅新通志

卷六十九

人物志 羣材四

三

趙永清永昌武生嘉慶中入伍得鎮番把總駐防和闐後征黑番車路溝所向有功咸豐中致仕歸適歲歉卽以所餘俸分給貧人未嘗稍吝子啟榮由武舉得肅州千總駐防葉爾羌後積功至花馬池都司

白輔宸永昌武生方夷之亂也其父斗守水泉營以奉協檄戒兵勿動及堡陷宸擐甲執戈呼眾咸奮追擊於高古城之西虜望風而靡高古水泉賴以無害其父亦免譴焉後中武舉

張爾德字據可永昌郡學歲貢胸襟灑落舊有婢僕六七口貧不能畜或勸鬻之拂然曰吾役人之力何忍利其身悉遣去爲固原學官巡道某遇不以禮遽拂衣而去

陳玉潤字子溫永昌廩生性爽朗學以實踐爲期設塾里中凡來學者必期造就嘗語人曰人雖材質不齊然無不可造者特時有

遲早耳以故四方來學者日眾

蕭良玉永昌人爲本邑刑科掌案性耿介取與不苟適有疑獄訟者持數百金詣門求庇良玉不可曰吾不能以子孫易人錢卒弗受後垂暮家居遇地方有事必爲之排解嘗語人曰吾居詞訟科最知詞訟之害是不可蹈或有訟者則曰勿令蕭公知其公正乎於人有如此者年七十餘而卒

張 典字伯常永昌歲貢生生平不輕言不妄動且友于性成事親最孝及母沒哀毀骨立目不交睫者歲餘家故豐至同治光緒同匪兩變房舍菽麥焚毀立盡日常不給怡然無戚戚之色自言從憂患困鬱中默識心性本源生平得力處在此後主講雲川書院以聖學相砥礪嘗謂及門生日喜怒哀樂中乎節視聽言動準乎禮子臣弟友盡其分此吾儒終身行之不盡者

甘肅新通志

卷六十九

人物志 羣材四

三

李熾昌永昌庠生字東侯少有異才操持高潔不輕諾人皆信之同治同匪之變奉憲檄招撫賊眾事雖未果然往返再四跋涉於冰天雪地之中其獲免於危殆者幸耳

茹發梓永昌介賓性誠篤遇事能任同治同匪之變團練民勇守禦及石成器潰兵過永發梓釀金市牛酒借李熾昌往犒其叛兵約以不殺掠遂信宿而去秋毫無犯

唐綿延古浪人嘉慶己巳 恩貢主邑龍山書院講席二十餘年裁成後進闡發經蘊嘗謂經學大體有三一聲音訓詁一民物制度一微言大義孜孜訓誨門下成就者甚多至今稱經師焉

張 倬古浪人歲貢生邑舊無書院嘉慶二十五年倡捐創建龍山書院並籌士子膏火自此文風日上繼其後者咸稱創始之難嘗造杜酒留穀以養貧民至今稱之

張銘新歲貢倬子有才識同治間遊氣臨境邑設營屯局糧草局
邑令某委銘新總理採買轉運等事不誤公不擾民籌畫精富孤
城得以保全

魯一清古浪人同治間歲貢主邑振育書院講席造就多士他邦
知名士往往致書論辨一清闡發古今疑義力除門戶之見皓首
窮經躬行不怠性直戇後學見而生敬儂薄者類皆聞風趨避

張世偉平番人隨大將軍岳鍾琪建功金川新疆地方由武舉官
西大同巴里坤甯夏涼州西甯等處總兵所在政績卓著 上召
對 賞賚有差世爲平番望族

李夢白字蓮卿平番人剛方正直教授生徒不憚勤誨無力者給
之書籍食以飪粥遠近負笈接踵門牆每逢考試其弟子採芹者
十居三四有餽謝者叱之由是令聞廣被後得保薦歷官知府卒

甘肅新通志

卷六十九

人物志 羣材四

三

於廣南囊橐如洗馳驛歸葬

李可珠字探天平番人學術正大厚同氣篤宗族以禮法自繩德
器粹然故賢者悅其德不肖者服其化兵備道蘇霖以文行兼優
旌之

李遵儒字伯寅平番廩生天姿絕慧淡於名利雅好儒術成就後
學甚多著書見藝文目錄

朱多貴平番人賦性敏捷同治初由行伍歷任連城指揮營千總
後西甯辦事大臣王某調選征討勞績卓著委署巴陵營守備以
疾不赴

何得彪字虎臣平番人同治二年由布衣擒賊有功以參將用西
甯辦事大臣豫師稱爲飛將後署西甯鎮標守備光緒二十一年
奉調前往河湟解圍屢戰克敵帶傷連克五堡以功 賞穿黃馬

桂記名提督博多歡巴圖魯署河州挂印總兵借補中衛協後詣
京 召見補福建汀州總兵因辦理軍務未赴任旋於軍次因前
傷復發卒事 聞詔賜祭葬從優議卹廕一子繼光縣丞並 賞
戴六品藍翎

閻文炯字南坡魯永和字蘭亭俱平番人文炯生員同治二年回
亂倡辦團練以衛民生永和都司銜歷任連城營千總兼理文案
有才幹書答百函咄嗟立辦事母至孝鄉人稱之

閻爾貴字子良 恩貢生杜其昌字叶五生員俱平番人爾貴性
聰穎教授生徒遠近爭師之其昌文優品端設帳教授孜孜勤誨
蘇應澤字錦堂楊生泮俱平番生員應澤襟懷脫灑酷嗜經史生
泮教授生徒竭力迪訓

王錦章字雲樵平番人長於吟詠總督左宗棠贈聯有詩中自合
甘肅新通志 卷六十九 人物志 羣芳四 罕
愛陶潛之句由廩生以勞績保典史不就著書見藝文目錄

張 銘字西軒平番人周繼張叛銘帶勇剿滅總督某賞給藍翎
五品頂戴以縣丞用同治九年正月回賊乘夜登城銘縋出城詣
大軍請救城得不陷其後力行善舉不懈人倚重之

杜 鈞字鴻初平番人歲貢同治十三年隨大軍克復西甯大通
縣城以功署慶陽府學教授勤於訓迪孝事孀母終身無少衰後
母卒廬墓三年善書法有聞於時

甘州府

漢金 賞日磾子嗣侯爵宣帝時爲太僕 傳見涼州鄉賢

明徐體仁甘州衛學庠生通古今文潛心力學成化七年撰雲臺寺碑記

徐 昊山丹人以楷法著名宏治年任河南洛陽縣丞時勅建廣化寺貢生張嵩撰記昊爲書勒石

王 輔甘州衛人將軍綱子也因父死王事誓竭忠復仇以殲虜爲志累官至延綏總兵於嘉靖十五年四月涼州報賊出沒五月莊浪報賊出沒輔先後襲至扒沙孤山散岔各境斬獲虜首百數十軍全勝以歸乃疏辭爵賞乞賜父綱祠額蒙上書憫忠二字賜之哀其志也自是虜懾輔威不敢窺邊者將二十年

張 銘山丹人嘉靖初歲貢歷任河南汲縣令以文名孫宏業衛甘肅新通志 卷六十九 人物志 羣材四 聖

學歲貢嘉靖三十六年任霸州吏目四十三年升固安主簿克世其家學焉

汪廷佐甘州人隆慶元年由指揮擢鎮番參將萬歷間都御史侯東來奏請以磚砌城廷佐與其勞躬督版築繕修完固後升甘州副總兵

馬應龍山丹人隆慶初任湖廣襄陽府穀城縣教諭萬歷元年欽差提督學校湖廣等處提刑按察司副使姚驗嘉其賢能錫竹額曰文宗旌進

王尙綱山丹人以文取太學生任蘭封縣主簿萬歷三十四年撰馬喝喇碑記

王 進山丹人疏水利允平諸司嘉之賞給義民冠帶鄉飲延爲大賓

葛 賴甘州人萬厯間授鎮番參將從征青海松山諸寇以功加副總兵銜

國朝張 欽甘州人由行伍康熙間任涼州都司雍正元年駐防布隆吉救援亂泉子有功凍傷手足

常守仁甘州人同治中任永昌副將未幾賊攻陷北城守仁督兵巷戰手刃甚眾逐賊出城得無恙

鄭僑柱字芝庵張掖人寄籍江都入伍積功康熙二十五年任四川重慶鎮總兵凡請鑲卽發倒馬代賠補汰老兵遴子弟充補捐辦舟楫緝匪沿江安堵嚴於救火俾免攘奪土木營工從無累役在鎮十五年解組歸渝奉勒去思碑以送焉爲母王氏刻一門三烈記

韓良輔張掖人康熙辛未探花積勞授崇慶總兵威惠顯著晉陞

甘肅新通志

卷六十九

人物志 羣材四

聖

兩廣總督

錢萬選張掖人康熙間由行伍隨靖逆侯張勇勦征叛藩吳三桂有功又從振武將軍孫思克隨 駕進勦嵐山奮勇克敵世襲拖沙喇哈番授廣東左翼鎮水師遊擊沒於任奉 旨追贈昭勇將軍賞給夫馬由驛護送回甘

高 孟字浩然張掖人性質直精騎射多力善搏從征王輔臣有功授守備旋擢遊擊晉延綏總兵久之移鎮川北削平川東復進征滇南事平徙甯夏總兵再徙涼州有四鎮元戎坊其平唐四侯也城破眾散與四侯相抱仆地反覆間以所冠兜鍪碎唐首斃之既老乞休歸里

王世榮字壽申張掖人以監生從振武將軍孫思克征噶爾丹振武用其謀大破虜師噶爾丹騎單峰駝遁去獲馬駝牛羊無算卽

授守備事平積多擢遊擊遷神木協副將

劉可德張掖人康熙中從征積功官直隸大名副將賦性伉直不善事上爲制府所糾旣罷奉 旨入 覲補一等侍衛久之復以副將協鎮定邊卒於官

孫一貴張掖人由行伍於康熙間從孫思克隨 駕征勦嵐山奮勇力戰得功蒙 恩賜世襲拖沙喇哈番歷任川陝督標中營副總兵卒於任

陳 史字金鑑張掖人志學工文康熙丙子舉人任涇川令終河內令宰涇川時爲張掖購書七十四種置公所後其子維衡請歸書院女秀全秀勤俱能詩

陳宏德字子修張掖歲貢性沈正耽書史居恆講身心體驗之學好獎勵人物鄉里善士多賴以聞於世

甘肅新通志

卷六十九

人物志 羣材四

三

馬羲瑞字肇易張掖人博涉載籍有聲於時能詩製有天山雪傳奇頗膾炙人口云

孫士魁張掖人康熙乙未榜眼由侍衛七任總兵到處有聲音變輿衛雲麾使材勇出眾

馮君洗字慶餘張掖人材武有大略以軍校從征累功擢遊擊旋從孫思克征噶爾丹屢摧強虜功賞甚渥久之晉河南河北鎮總兵旣老家居捐資建黑水橋雍正新城之變又輸金峙戎具子克明廕光祿寺署正候選同知孫璟任都司

秦國英字俊公張掖人甫冠遊庠選貢登雍正己酉賢書會試開通榜授商州學正給假省墓遂優游林下掌天山書院近二十一年所著散見碑記

馬良柱張掖人其先回種由行伍隨征積多擢四川副將乾隆十

二年討金川破賊班欄山松林口解沃日圍收降小金川之眾直抵上孫克宗後因丹噶失事被劾解京 上念其驍勇命試舞鞭赦罪回營立功仍統士兵累陞松潘鎮總兵

張人偉字俊公張掖人武舉猿臂善射嘗於馬上回身仰射飛鳥應弦而落後由臨洮營遊擊陞甘州城守營參將

王世俊字子千張掖人性篤摯好古通天文精六壬讀書窮理洎老不衰究心河圖得先天精諦年七十以明經卒於家

王宏珏字琢庵張掖人少豪邁善書工詩弱冠貢太學入貲得直隸房山丞優於其職久之擢知福建詔安縣閱八月去官又十年歸里不涉世務

曹毓瑞字杰生張掖人博學能文嗜古不倦登乾隆丁卯賢書由高陵縣教諭陞任鞏昌府教授姪德元登戊戌進士子孫克繼其

甘肅新通志

卷六十九

人物志 羣材四

四

傳家學賴以不墜云

馮世和字泰宇張掖世族也幼聰穎從父珍宦遊湟中與名公巨卿相琢磨文章益進壬申登賢書主司嘉其五策冠場甲戌成進士任四川永川知縣著書見藝文目錄

郭日春字際和張掖鄉貢士狀貌魁梧性情誠篤少好學與諸文士吟詩作賦雅令宜人子人麟癸酉選拔甘人稱世衍書香云

王用申字子極張掖人性沈毅淹貫經史百家敏於爲文戊子己掄解主考以邊才另編聿號置亞元乙未成進士嘗讀書人祖山因號曰東山著書見藝文目錄

楊春蔚字爾茂張掖人嗜書史循循善誘求教者必爲之講貫日夜不倦興酣落筆品格高超子楷登丙辰鄉榜能世其家學焉任 侗字子愿張掖人性沈靜不慕富貴長不滿五尺而心雄萬

夫與諸聞人吟詩論文如萬斛源泉不擇地湧出也

任萬年字子齡張掖人嗜古不倦工翰墨精詩藝與諸名士遊樽酒論文咸稱博雅子育德得家傳楷法迄今官署民廛必黏尺幅以爲式

楊維元字周臣張掖人外貌恂恂似不能言者其中則富有古今卷軸由明經登鄉薦四方英雋胥從之遊甫五旬卽雅慕田園之樂閉戶潛修自號雪園

高良棟字子傑張掖廩生幼穎悟嗜學長厯江浙購求遺書熟於厯代史鈔子文煥能文 恩貢生

高元振字伯麟張掖人端嚴廉潔師道自尊凡所誦習必見諸實踐遊其門者若宋子宏識李子善道善士並列魏科子縉以明經重於庠郡人推爲兩世學行兼優云

甘肅新通志

卷六十九

人物志 羣材四

墨

張聯元字瀛客張掖人幼穎異長復博學每吟詩不須揀韻而立就尤嗜飲醉後濡毫輒二三十首筆不少輟工峭異人生平戲以太白白負甘庠稱老詩伯焉

阿應鱗字鏡潭張掖人幼聰穎十歲能屬文弱冠登賢書嘉慶壬戌成進士選江西廣豐令廣豐號稱難治應鱗履任未期月化行俗易健訟者多斂跡兼善鉤距術劇盜聞風遠遁上官嘉其能有棘手案往往檄使代辦以廣豐治行第一入 告得 旨褒嘉尋

調南昌政績一如在廣豐時年五十三以疾卒於官南昌人罷市巷哭其能得民心如此身後無餘財同官集貲歸其櫬及其妻子孔文鏞張掖舉人咸豐閒任廣西象州事有惠政人呼爲孔青天何 瑄字玉亭張掖人由行伍起家同治初以功授巴里坤總兵官時纏回變亂西域用兵巴里坤爲賊巢聚地先是拜總兵 命

者舉遠巡不敢赴任瑄履任後拊循士卒備戰守晝夜無少息兼以糧道梗饟精不繼瑄指拄補綴力保危城時南北路各城多失陷而巴里坤獨無恙事平除四川提督以年老乞休歸里卒子嘉榮以廕授通判

王克修字竹亭張掖人性孝友有大志喜讀左氏春秋未及冠投筆從戎同治間佐梁揚兩提督幕克復肅州平定金積堡之役指畫戎機多響應積功 賜花翎以參將用除肅州守備升安西都司治事一秉禮法不少苟而貌恂恂若書生見者不知其爲良將也善書擘窠大字卒後甘人士咸寶貴其遺墨云

黃金臺字鎮燕張掖人性戇直好善同治初任團總之責勞怨不辭積功給藍翎守備

馬起蛟張掖武生世襲雲騎尉歷署都游親老致仕里居同治四

甘肅新通志

卷六十九

人物志 羣材四

吳

年三月初七日督帶團丁巷戰擊退逆回甘城賴以保全後積勞病故

柏玉成張掖人甘標行伍同治四年三月初七日賊眾來攻成取軍庫大礮連轟之賊懼立退後積勞病故

李懋學張掖歲貢與李蘭林均古城驛紳耆同治四年回匪犯境設滾木壘石日夜守望擊斃賊百餘人城獲無恙自是賊雖連年騷擾而絕不敢逼近城垣以二人力也後積勞病故

喬國鼎字鑄九東樂人郡廩生沈靜好學守義樹節與胞弟歲貢生國鼎均工草書備極友愛設帳廿餘年遊泮者二十餘人子孫悉在庠能世其家學焉

張明德東樂人郡庠生讀書好古誘掖有方設帳廿餘年凡貧寒子弟皆得入學就業縣丞馬贈儒宗範俗匾額

張學書字三味東樂人充水利農官崇儒好善公正不阿嚴禁私墾以保護水源並設塾延師課讀成就地方子弟甚夥子孫悉入庠人以爲種德之報

龐清俊東樂人郡庠生設家塾訓地方子弟勤懇弗倦縣丞葉德乾整理興文社清俊與有力焉贈隆學校端士習匾額

周士美山丹人順治間 恩貢任兩當縣學訓導能文康熙十五年撰轉輪寺碑記

謝 治山丹人康熙初從總鎮肅大都督潘某征噶爾丹積功陞廣東提標遊擊後奉 旨贈驍騎將軍授兩粵總兵雄武倜儻威望卓著

趙廷鑑山丹人康熙戊寅拔貢歷任延安府教授文藝才猷邊陲稱最佐理安邊縣事有能聲

甘肅新通志

卷六十九

人物志

羣材四

四七

毛繼武山丹人康熙乙酉副貢任澄城縣教諭好學不倦課士殷勤成就生徒甚夥

崔喬楷山丹歲貢嘉慶初任陝西整屋縣訓導文而有才佐縣令均水名譽著聞士民欽和思報製鋪頌德

張廷贊山丹歲貢同治十年同貢生姜從善等創修洪水書院顏之曰金山人才之興皆其力也

張聯星山丹人幼時家貧爲人牧羊朝夕過學塾聞塾師講書輒傾耳而聽塾師奇之教之讀彌年淹貫經史補博士弟子員旋獲選拔

郭邦選山丹歲貢穎異博覽爲文脈正理純以道學爲宗士林重之

曾 仁山丹武舉通文藝喜吟詠氣度溫雅事親以孝有儒者之

風馬

楊正春山丹人生平老成持重正直端方子茂生副貢自作行述
傳世

甘肅新通志

卷六十九

人物志

羣材四

吳

三國魏龐 洧字子異酒泉表氏人也初以涼州從事守破羌長會
 武威太守張猛反殺刺史邯鄲商猛令曰敢有臨商喪死不赦洧
 聞之棄官晝夜奔走號哭喪所訖詣猛門哀乞首欲殺猛猛知其
 義士勅遣不殺由是以忠烈聞太守徐揖請為主簿後郡人黃昂
 反圍城洧棄妻子夜踰城出圍告急於張掖敦煌二郡感其義遂
 為興兵未至而城已陷揖死洧乃收斂揖喪送還本郡行服三年
 乃還魏王聞之辟為掾屬文帝踐祚拜駙馬都尉遷西海太守賜
 爵關內侯

楊 豐字伯陽酒泉人少游俠常以報仇解怨為事建安中郡中
 強族黃昂殺太守徐揖重募取豐豐遂逃走武威太守張猛假豐
 為都尉使齎檄告酒泉聽豐為揖報仇豐遂單騎入南羌中合眾
 得千餘騎從樂浪南山中出指趨郡城未到三十里令騎下馬曳
 柴揚塵酒泉人望見以為東大兵到遂破散羌捕得昂豐遂殺之
 黃初中河西興復豐乃還郡舉孝廉州表其義勇詔即拜為駙馬
 都尉

甘肅新通志

卷六十九

人物志

羣材四

四

明李 迪永樂中任指揮使掌篆讀書好賢

吳 釗以都指揮鎮守肅州城垣兵器之數多所建置

張 暹鎮夷人任本所千戶永樂八年襲北虜於紅崖子大捷獲
 以勇敢聞

鄒 和任指揮教民樹藝稻田人享其利自和始也

丁 剛都指揮僉事鎮涼州永樂八年勅充驃騎將軍十一年夏
 領軍由鐵門關進征至哈梅禿遇賊斬小顏卜花而還

查 勇本衛人任嘉峪關守備有開井退虜之功建廟安神軍民

無災異之患陞鎮海遊擊時又有盧漢者亦本衛人任涼莊遊擊有聲

郇崇儒高臺人萬曆三十四年歲貢初任山西徐溝縣丞甫到任值河崩洩將及城百姓逃避者極多崇儒至身先赴水民散而復聚各具土袋一時隄成民安如故奏聞上嘉其才猷特陞榆社縣知縣在任六載因病解組

國朝于顯龍肅州總寨堡人順治四年逆回米納音丁國棟作亂陷甘肅屠戮甚毒顯龍父應徵兄仕龍父子三人倡義籌畫護守應徵唏噓曰徒守彈丸無益非請大兵援不能救一郡生靈顯龍遵父命單騎潛赴提督孟某報逆同情形孟某大喜隨發副將馬齊二員統領大兵進剿卽以顯龍爲鄉導由南路一晝夜至總寨堡駐紮適逆回搶擄本堡先遣顯龍擊賊趕至排路河灘一戰而勝逆

甘肅新通志

卷六十九

人物志 羣材四

辛

回退保肅城堅閉不出顯龍領兵圍攻一年不下大兵糧饟不濟應徵父子將家中所積米麥八百餘石輸助軍饑庚癸無呼兵氣大揚未幾丁國棟自殺大兵恢復肅城總鎮都督張以顯龍父子興義急公遂請諸各當道准署金佛寺守備嗣因裁缺改署肅州衛守備歷任數年謹慎供職尋以親老辭退父子皆壽登期顯子孫科第蟬聯肅人頌以忠義世昌云

王琮字黃山肅州人康熙甲子科舉人會試不第隱居授徒專尙理學其門下多名士遠近學者宗之稱爲黃山先生

郎建業肅州人由行伍雍正間任涼州副將屢戰擒賊有功

郭維城字士宗肅州人性敏悟而勤學行尤端謹由舉人官蘭州府學教授訓士勤謹自奉儉約辭官歸里復主金泉書院講席數年士子成就者不少有子九人一貢成均二領鄉薦六食廩餼皆

庭訓也著書見藝文目錄

殷發祥字雪坡肅州人幼時父命學道家術值爲喪家誦經發祥執樂器錯調其夥咎之發祥忿然棄其樂器而走向父母哀求願讀書父嘉其志命入塾由是發憤攻苦中道光乙酉舉人會試不第歸里教授生徒成就極多州人咸稱頌之

楊天興肅州人由行伍歷擢定邊協中軍都司有權謀善騎射嫻烏槍果敢識機道光二十四五年間羌番勾結奸回屢次犯邊天興爲金佛寺把總率十餘人捕殺番匪甚多後賊愈熾甘肅索提督募獵戶千餘防剿委天興權都司統領之天興善駕馭賞罰嚴明迨去任繼者不能制仍散入山爲匪其關外赤惠獵戶尙在南山洪水壩後因課金不發與城回密約大肆焚掠肅城陷省中大吏差天興同守備吳澍赴肅相機剿撫至高邑察知同情天興主甘肅新通志

卷六十九

人物志 羣材四

五

剿吳主撫意見不合行抵城下回出迎吳入城天興馳去賊追不及隨委天興權金塔協篆延紳會議練勇未就緒而黎道邀辦軍務天興屢進謀不能用後墮賊計卒如天興言黃王各軍亦不能大用天興憂憤卒

胡文炳字虎臣肅州王子莊人祖籍陝西郃陽道光己酉拔貢本科舉人學問淵深精於考據歷主金塔柳隄肅州金泉諸講席造就多人同治壬戌大挑一等官湖南匯同知縣在任三年以清直著稱卒以忤上司被議歸至陝西隱居教授年七十餘卒生平著述甚富其梓行者見藝文目錄

黃玉年崔和桂皆肅州人同治間大軍剿賊各派員分駐邊山民莊勒捐糧重疊需索眾戶力不能支數欲抗捐二人以大義多方開導而某官反誣二人市恩於眾竟將二人鎖押委員搜括愈甚

適逆回攻陷金佛寺堡於是邊山各堡民多被脅從馬統領一軍向賴邊山供支至是芻糈缺乏始放二人歸二人復以大義開導令早歸正凡從賊各莊亦次第拔歸其公正足以服人如此貢生王慎品庠生祁光先農民李生達皆肅州人同治間回變二人倡義練勇七百餘名以邑民高國懷潘登科爲左右長歸北營馬遊擊統領所需糧草器械馬匹悉由王祁李三人勸捐供支籌辦數年更換統領不一時王統領以此勇久經行陣奮勇敢戰且素知賊情戰無不勝於是分隸各隊以爲嚮導三人倡辦之功不可沒也

閻如岳高臺鎮夷堡人廩生甘州高臺居鎮夷黑河上游水利不均每年四五月間需水時甘州高臺之民攔河阻渠鎮夷毛雙各堡涓滴不通禾苗亢旱如岳率鰥老居民申訴制府紳某求定水

甘肅新通志

卷六十九

人物志 羣材四

五

規而甘州高臺民衆力強賄囑固備極艱苦如岳百折不回由康熙五十四年迄雍正二年經大學士總督年羹堯確查 奏明定以芒種前十日由安肅道派毛目水利縣丞巡河封閉甘州高臺渠口鎮夷毛雙各堡得受水十日永以爲例里民置祠於芒種前十日祝如岳並大學士年羹堯等迄今不替云

閔國士字際隆高臺人康熙壬子 恩貢性敏而學博詩文兼擅尤嗜尙書其時甯夏趙良棟任高臺遊擊年纔二十餘喜讀書敦聘而受學焉執業未幾輒通經義智勇絕倫終爲國家柱石實國士之成就居多其後良棟子燦亦受業於門康熙己巳銓鳳翔府寶雞縣丞以親老辭不就

李士選字季升高臺人康熙癸酉歲貢夙受業於閔國士門下手不釋卷端嚴峭厲文行兼優設教本邑及門之士多所成就選授

洵陽縣訓導多士景從在任六載尋卒

譚世務鎮夷歲貢博學多聞主酒泉書院講席士林翕服

章 浚字鑑堂高臺人由舉人授貴州餘慶知縣廉明有政聲薦升平越州遷思南府擢思南道加按察使銜時髮捻各匪隨處跳梁浚謹備戢守無毫釐罅漏滇黔督撫倚以爲重咸豐六年卒於官當道者咸惜之

吳士明高臺鎮夷堡人原官本營經制善騎射同治六年九月竄匪登城游擊熊來順率衆死拒賊負城民狙伏莫敢上時夜半略能辨色士明度玉皇樓甬道火焰奔騰賊必不守促衆從烈火中首先登陴驍賊甘某舍命來拒士明驟發一矢穿透左額墜城斃兵民蜂擁而上賊衆潰散城得危而復安里人至今壯之

安西直隸州

北魏宋 稚字季預敦煌人景明二年拜白水令在任十一年頗得民和後遷渤海太守

唐郭知運字逢時瓜州晉昌人從郭虔瓘破突厥有功擢右驍衛將軍時吐蕃將岔達延乞力徐寇渭源盜牧馬詔知運與薛訥王峻等相犄角敗之進階冠軍大將軍兼臨洮軍使封太原郡公賜資萬計徙隴右諸軍節度大使鄯州都督卒贈涼州都督配享太公廟諡曰威

五代曹義金本沙州長史朱梁時張氏後絕州人推爲帥遂授歸義節度使子元忠孫延祿等周宋時俱遣使奉表入貢授本軍節度加中書尚書僕射等官而以節度使之弟爲瓜州防禦使刺史等官直至宋仁宗時封爵不絕

甘肅新通志

卷六十九

人物志 羣材四

晉

國朝傳 嘉安西州人性剛介隨征川楚以軍功授千總累官至河州中營遊擊善撫循士卒營政肅整事兄以弟聞凡家事悉遵兄命道光六年告假省墓大府委署沙州營參將辭色恂恂父老爲之起敬

趙壽洳字次彭安西州人幼有膽略知書史以武生歷保三品銜選用衛守備同治初逆回變亂安西適當其衝壽洳白營道練團勇爲防守計得精壯數百名教以兵法儼成勁旅逆回憚之手申春郡東告急壽洳以城防責其子瞻淇親率團勇往援比至賊已入橋踏界壽洳急尾擊之賊突西奔橋踏得無恙聞賊圍瓜州命子瞻淇往援與賊相搏賊乘虛攻入州城壽洳聞耗憤不欲生糾集團民數百乘夜赴敵命人各持火繩數頭並燃之是夜人喊馬嘶火光萬道賊眾驚曰趙家團勇至矣遂棄城而遁壽洳撫輯殘

黎倍嚴防守時遇饑饉死亡載道壽洳以倉粟設廠賑飢活者以千數東路各堡屢爲賊陷壽洳貸以貲皆令修築農民無力耕種者予以耕牛種籽迨左宗棠度隴壽洳復陳民情凋敝請款撫恤均蒙採擇施行論者謂安西之尙有子遺者皆壽洳之力也隴事定以功保衛守備壽洳雖事武功而嗜讀弗倦其子弟亦多以文學顯

趙瞻淇字衛卿壽洳長子也好讀書通大義每佐父挫賊以功保通判光緒二十二年河湟回變餘匪西竄新疆各軍扼南山要隘賊不致竄入腹地而軍糧恆不敷淇率團民數十騎護運道採購軍糧常被賊劫掠淇率團民奪返失糧諸軍得以充腹其任事勇敢有父風云

趙學詩敦煌狄道坊人性孝友博學能文舉茂才試屢冠軍乾隆

甘肅新通志

卷六十九

人物志 羣材四

妻

四十二年舉拔萃科五十一年登賢書負詩名士林重之有趙敦煌之稱惜未仕早卒

朱景雲敦煌高臺坊人性質樸嗜學由歲貢銓陝西麟遊縣訓導抵任大吏以樸實檄飭權麟遊令民有訟者悉以和平勸諭邑人頌之以老乞歸田里

盧徵五字聘商敦煌鎮番坊人性純篤弱冠食餼邑令慕其品學延主鳴沙書院講席講論終日無倦容成就者多由 恩貢銓陝西洵陽縣教諭未到任而卒子孫多入邑庠

呂際昌敦煌隴西坊人性耿介甘恬淡由 恩貢銓陝西膚施縣教諭辭不就樂貧嗜學至老不倦

陸 臨敦煌蘭亭坊人性和惠幼嗜學兼通岐黃由歲貢銓慶陽府學訓導約束諸生咸遵禮法俸滿調宜禾訓導子永綬入邑庠

雷啟瀛敦煌人道光乙亥舉人殫思社史持已謹嚴主講鳴沙書院士林悉資栽培同治初逆回起邑迫蹂躪縣令設辦城防以啟瀛爲團練管帶督率兵勇晝夜不倦籌款辦公井井有條性嚴厲人有過輒面斥之遇正人則謙恭相接時有不肖諸輩因謀不遂陰爲構陷人皆代爲之危啟瀛處之澹如也及冤白禍卽解

劉鳳翔敦煌人幼嗜讀及長好談兵善騎射同治初回逆變起東西戒嚴鳳翔投景尙書幕中佐理軍務以功敘縣丞旣而從征哈密明鏡泉以功上聞晉知縣加同知銜鏡泉調任塔爾巴哈臺參贊大臣鳳翔同往署通判事深得軍民心鏡泉沒於軍兵因關饑譁潰禍幾起鳳翔撫輯得法人心大定後乞假歸里值河湟回復擾亂當路檄鳳翔辦理城防戰守兼施布置得宜復蒙優獎楊秉仁敦煌人幼入伍同治五年以剿賊功歷保千總守備補用

甘肅新通志

卷六十九

人物志 羣材四

五

都司遊擊 賞加副將銜光緒五年蒙將軍金順保獎以參將留甘補用六年又蒙以歷次剿賊有功保以副將儘先卽補並 賞加總兵銜十一年又蒙金順以剿辦竄匪有功請 賞給二品封典未蒞任而卒

